

甘肅新通志卷之六十二

將才

馬伏波有言男兒要當死於邊野以馬革裹屍還葬耳此忠義所激故作沈痛語若乃謀勇兼優戰勝攻取所向無前績紀旂常名垂竹帛尚已即或勢窮力屈志決身殲英風義烈千載猶芳志將才見凡有功地方及以死勤事者此邦人士雖沒世不忘云

蘭州府

宋王 琦弓門砦巡檢建炎四年金人還至熙河琦禦之金人立招降旗衆皆拜琦獨不屈金人殺之

任 熙河路部將金欲犯秦川吳玠遣諸校分道伺之安與牛皓皆力戰死金人相謂真健兒也後皓安皆贈翊衛大夫官其家五人

甘肅新通志

卷六十二

職官志 將才

一

明劉 楨定遠人精騎射襲父原指揮使職調臨洮掌衛事招募精銳教以兵法築堡寨新城樓及演武廳常與部下同勞苦釐革宿弊武弁畏服

吳錫封字龍旌靖遠道標守備值大廟寇至斬獲有功陞守口參將晉利民副將致仕

張 釗順天平峪人任靖遠守備陣亡蘆塘有鏖戰碑後人亦多題詠

趙永和直隸人任靖遠參將修築東城添設打刺赤堡重修學宮
蔣 玉徐州人斌之子天順末以指揮陞都指揮僉事守備河州
成化初平復石城陞指揮同知公賞罰明號令涉獵經史兼善詞賦人稱儒將

康 永成化中以陝西都指揮僉事守備河州練士恤民疏廢渠

以通水利人咸便之

廖 斌陝西人成化二十三年任靖遠守備大浪口斬虜數十級大獲捷功遂割蘭城爲平灘堡有奏捷凱歌圖

曹 雄陝西人宏治二年任靖遠守備勇而有謀剛而好學嚴以教子寬以御衆累遷陝西鎮守

蔣 昂徐州人玉之子宏治中以指揮使掌河州衛事歷任十五年陞都指揮僉事守備河州不費公帑不勞民力而城垣櫓樓堡隘盡捐貲修葺兵民至今傳頌

霍 忠靖遠衛千戶性慧直遇敵敢戰惠以撫士以功陞指揮僉事擢本衛守備復以謀勇累遷甯夏東路參將

陳 善字敬甫由百戶屢獲戰功陞靖遠衛指揮僉事有謀略會大虜犯境發數矢連喝數聲虜即退歷任甯夏副將

甘肅新通志

卷六十一

職官志 將才

一一

張 鳳榆林人爲靖遠衛指揮簡卒練兵禮賢下士好射獵軍士有獲即賞與士卒同甘苦由是人多奮勵遇虜多建奇功邊圉宴安進大同參將父子俱歿於陣朝廷建祠死所歲時享祀

白 爵延綏人爲靖遠衛指揮修築大邊建東西水門重樓陞宣大鎮守總兵有政蹟記

張世勳正德元年靖遠衛指揮會外寇入境追至亂麻川對敵陣亡有王龍山輓詩

盛 瑾正德初以都指揮僉事守備河州有文武才

魏 益三原人宣使公之後父載成化時從征滿四死於陣益痛父死乃練習騎射潛心韜略屢從征戰初敗虜於雪山繼敗羌於岷州又於大浪口手刃虜酋小鹽池俘斬虜首以功授靖遠衛百戶正德四年追虜至定邊營身中三矢奮擊愈力虜駭退遂亡贈

千戶

朱奎光嘉靖初任靖遠鎮撫司有殺人於街衢者累月不明奎光質諸城隍是夜夢一家鴿飛鄰人安慶屋上奎光寢測曰此必葛氏家有安慶者訪得葛氏有童僕名安慶子拘訊即服連誣盡釋衆稱神明

崔天爵延綏人爲靖遠衛指揮雅好文學訓練士卒有折衝樽俎之度進宣大副將

顏 臣字朝卿甯夏中屯衛百戶屢立戰功陞指揮嘉靖十九年任靖遠守備有才幹多奇謀進延綏游擊

黃 恩嘉靖二十一年任靖遠參將修築南關增戰馬操練武藝攢喂馬臚西援一夜抵金城止損一馬後因註誤去任人皆惜之李奉朝南直隸宿松人靖遠衛百戶嘉靖三十一年浮圖塔大虜

甘肅新通志

卷六十一

職官志 將才

三

攻營奉朝一矢中酋長吭殪之虜遂北陞副千戶四十二年定邊清水營大將郭振失利奉朝與百戶莫維賢併力堵虜自辰至午有褶甲二虜持刃背向衆虜後擁奉朝張弓連發二矢二虜俱殪虜全退奉朝歸解甲即死移時方甦其勇烈如此至建永安堡措置皆出其經營

李文瑞父世爵任榆林衛指揮調補靖遠文瑞襲指揮僉事以勇敢揀領入衛軍隆慶丁卯竇兔率輕騎內侵文瑞隨守備楊鼇截虜斬首二級奪回人畜馬匹無算明日虜由郭城驛經城下復領步軍百十名同指揮張鵬千戶李得林魏印截虜於轉嘴山衆寡不支遂歿於陣

陳 溥字德源蘭州衛指揮僉事孝友好學臨政明敏持己廉慎尊賢禮士所至無擾弟清字德廉襲職即焚香誓於先祠曰若清

貪財壞法上隳父兄之業死有餘辜於是折節下士講明兵律之學至忘寢食掌衛事十餘年清勤如一

李得林靖遠衛千戶奉朝子善騎射有膂力嘗逐虜於柳林灘隆慶元年冬虜掠城下得林與魏印射殺數虜援兵不至身中三矢猶奮力攻擊遂歿於陣時年三十

魏 印益之五世孫屢立戰功陞靖 衛千戶隆慶元年冬一聞虜警乃與李得林連日接戰矢不空發虜識之至轉嘴山被害獨慘時年二十有二

于天福靖遠衛千戶隆慶三年秋守備李煦以五十騎命天福防禦沙金坪天福與虜戰衆寡不支歿於陣

孫 月榆林衛人由武進士任靖遠守備善練士卒用兵有機謀劉世忠鎮番衛指揮善射謹兵堠時虜多內犯世忠師出有律每

甘肅新通志

卷六十一

職官志 將才

四

戰獲功竟爲邀功者誣罷

李 煦固原衛千戶因戰功陞岷州守備甫三月調任靖虜見地衝兵少增舍餘軍討給戰馬三年陞榆林游擊旋擢甯夏鎮守以疾乞歸

李文華江西南昌人隆慶四年以兄陣亡功進靖遠衛指揮同知率軍士修理邊堡暨本衛礮臺防守亂麻川堡

劉 濟字北河永昌衛百戶隆慶五年以副總兵攝靖遠參將事揀選材官子弟以資訓練招募軍丁修理城門樓鋪建置永安諸堡進甯夏副總兵尋陞鎮守

霍 璽忠之子靖遠衛指揮同知沈毅多慮薦陞階文守備轉甯夏游擊以戰功擢蘭州參將北虜遠遁晉甘州副將與士卒同甘苦有古良將風

路 經靖遠衛指揮篤志好學不屑組織文名一時五科不第爲母命承襲先職善撫士卒恩威並著

李 寵靖遠衛指揮悃悞無華不假騶從兩選軍政百廢振興再攝監收一介弗取時有殺人者逃匿之案久不決寵牒諸城隍越一年而殺人者即服辜人稱其明又嘗修理城鋪補葺學宮不擾地方公私稱便

貽 欽甘州衛指揮善騎射多謀略先任北路游擊以堵回大虜遷靖遠衛指揮打刺赤坪有欽戰勝碑

徐仁威延綏新城人萬曆七年任靖遠衛守備勇敢有謀洞悉夷情尋陞神木參將

李應元奉朝孫萬曆七年靖遠衛千戶防守大廟堡猾虜竊寇應元追逐奪回韃馬六匹牛羊百數十巡按崔某薦之

甘肅新通志

卷六十一

職官志 將才

五

李崇義莊浪衛百戶萬曆八年任靖遠衛守備多智善謀練士卒精技藝除礦徒以杜虜隙尋陞洮州副總兵

魏承勳益六世孫印之子幼器局宏偉長負才能萬曆十一年嗣職千戶選軍政管所事尋爲靖遠參將營把總庚寅夏和征之戰斬虜甚衆獲馬匹尤多已而標兵潰散承勳與李如玉併力對敵矢盡持短刃接之身被流矢爲亂刃所害時年二十有五

劉 縱字省吾南昌人都督顯子勇敢有父風萬曆二十年爲臨洮總兵官火落赤真相昆都魯歹成他卜囊等掠番境窺內地縱遣部將擊之莽刺川斬獲甚多帝爲告郊廟宣捷縱進秩予廕後縱死遼疆之難天啟初贈少保

吳繼祖山東泰安人萬曆時爲靖遠衛參將中軍巡按薦語御兵有儒將之風撫士真循良之吏

李萬姜唐晉王之後萬歷時任永泰堡守備追賊遇害落馬陣亡
傳 恆延綏衛人由武進士爲靖遠守備值歲凶多方撫恤後陞
洮州副總兵

蕭如蘭字瑞陽延安衛指揮任靖遠守備洞悉夷情揀壯軍以實
部伍親督訓練修築陡城堡砦增置火車挨牌軍威大振夷人望
風歸降

陳所學節之子爲靖遠衛指揮僉事讀書好賢隨征平灘堡石嘴
地方奮勇血戰斬獲甚多

劉 永字昌年靖遠衛百戶幼從陳孟佐學易爲弟子員屢試不
第嗣先職有謀略嚴修武備後陞見卒於洛陽鄉士大夫爲輓歌
詩序著有樂齋詩適意稟各一卷

劉大勳由武舉任靖遠衛鎮撫司修築北城性慈祥不用刑法而

甘肅新通志

卷六十一

職官志 將才

六

人樂於趨事

黃 鉞蘭州衛軍隨游擊閻勳征四川叛賊廖麻子等追至劍州
天鵝山斬獲賊首超擢本衛指揮

楊繼尹以功授蘭州兵馬指揮居官清介執法不苛著有奇集錄
曹變蛟山西大同人崇禎時爲臨洮總兵官闖賊自洮州出番地
變蛟追敗之轉戰千餘里錄功進左都督

徐州傑靖遠衛指揮僉事崇禎十一年流寇猖獗陷湖廣州傑奮
勇隨征歿於王事

來 紹靖遠道標守備崇禎末賊寇紛起屢立戰功以打刺赤地
係衝要詳請防守應援招撫小水瓦窰馬營等處難民修築打刺
赤城垣敵樓人民依賴

國朝黎澤庚湖南人以守備從陝甘總督楊岳斌入甘帶親兵同治四

年陝回踞省北之秦王川省垣糧絕兵民交困澤庚率所部屯一條城軍令肅然逆回頻來窺皆擊卻之同治五年正月移紮甘草店澤庚因公晉省適督標兵變澤庚死之同時殉難者副將張東陽游擊石澤光蕭祖問都司胡連山李瑞山劉紹昆劉鴻世汪友勝馮玉山黃星芝守備朱寶田世襲雲騎尉周懋棟千總黃慶志彭英臣張萬泰周福友陳代香鄧蘭亭馬開賢劉福祥張本先張萬勝易榮福劉復賢曾芝顯慶壽藍翎千總署督標右營把總鄧楚良把總陳德香陳開友吳國耀田宗玉胡勝張兆廷曾宗揚李盛陳照廷羅榮國高星元外委劉法昌李柏林勇丁華兆亨羅啟佐羅得勝羅立朝羅在祿鍾啟鳳劉蘭桂羅榮廷羅榮松羅榮芳甘珊陳祥等共二百餘人事 聞均優卹如例

羅進賢湖南衡山人由軍功保提督同治三年楊岳斌總督陝甘

甘肅新通志

卷六十一

職官志 將才

七

討回逆進賢從之同治五年十二月狄河股匪四出掠省東路而防營之分駐省西七里河者復被圍進賢既勦省東路之賊又自率親兵三百人西赴馳救初十日黎明與賊遇大呼衝入賊披靡追八九里至黃家溝陷伏中進賢奮勇馳突槍斃悍逆十數馬蹕徒步跳盪賊麴集叢刺歿於陣參將唐明賢廖興隆以下死者十四人事 聞議卹如例

勝 福旗人官吉林伯都訥鑲黃旗驍騎校從征陝甘積功加副都統銜委參領同治六年甯夏將軍穆圖善署陝甘總督率所部入蘭省勝福與焉時東道梗塞奏報恆迂道北行由歸化城達畿輔適督署有疏入賫者難其選勝福應命至哈密拉圖遇賊數百勝福馘賊目一賊叢集遂遇害事 聞議卹如例

彭文林湖南人從甯夏將軍穆圖善西征以功保總兵同治五年

秋穆圖善署陝甘總督文林隨赴省同治六年八月十六日河州賊突撲省垣焚掠城南時文林奉檄赴省西張家河口督糧運聞警驟馬入城亟請於穆圖善願將五百人擒賊渠以獻穆圖善壯而許之遂率勇由袖川門出折而東行與賊遇於蕭家坪文林援矛躍馬左右橫擊適賊大股環集後隊勇潰文林陷重圍不得出爲賊攢刺死其先數日陣亡者有參將常泰護游擊戴得勝都司何正笏守備王茂春千總孟兆蘭徐茂春羅桂枝把總常正武舉蔣潤事 聞均卹如例

徐萬福字翰臣湖南長沙人由軍功歷保 記名提督 欽賜業肯普巴圖魯勇號同治壬申統領建威馬步全軍駐防皋蘭縣之阿干鎮時值亂離之後民多流亡萬福悉心招撫始漸安集城隍廟傾圮萬福慨捐千金督工重建煥然一新並購腴田七十畝爲

甘肅新通志

卷六十一

職官志 將才

八

香火資復於廟內隙地添建齋舍八間設義學頒書籍置水磨二輪以作延師束修之費士民感其德特立德政碑記與阿干山水並垂不朽云

周鳴高湖南長沙人少負材武以功保總兵會楊岳斌總督陝甘討回逆鳴高從隸彭楚漢部充哨長同治五年四月賊擾金縣屬之趙家岔清水驛鳴高隨隊出勦首先陷陣賊大敗遁去歸營汗出如注感風寒遂不起七月初二日卒於營事 聞優卹如例

眭金城字漢池湖南衡州人以功洊保副將同治六年左宗棠移督陝甘金城從之同治十年八月領左路右營隨前廣東高州鎮徐文秀前署福建臺灣鎮劉明燈進規狄河各軍先後次康家崖在洮之東太子寺大東鄉在洮之西非造筏渡大隊過洮無以施兵力時秋深水漲急溜洶洶十一日金城覓渡至柳林溝適賊由

溝偷渡金城會總兵黃宏藻合力擊之擒斬多名賊敗退洮西官軍得渡口矣忽對岸賊施槍轟擊飛子洞金城左脅立殞於陣是役也有首搶渡之副將喻有才參將殷德益及拔柵登壘之參將廖嵩皆中礮登時陣亡事 聞均議卹如例

徐文秀字華亭湖南湘鄉人以功累擢高州鎮總兵同治七年左宗棠移督陝甘文秀由粵西從向爲簡敬臨之副敬臨之戰歿也賴文秀力得全其師遂領所部克金積堡十年冬移而南進規狄河成浮橋於康家崖各軍渡洮而西文秀節節掃蕩至三甲集再進至董家山河回懼句結撒拉循化八工及米拉溝逆回助戰並分股出擾參將楊其昌護運至沙隴遇伏陣亡官軍糧道大梗十二月文秀率部忍飢銳進力攻新路坡賊壘破之同治十一年正月賊乘夜復於新路坡之東連築三壘又踞爛泥溝之四莊爲犄

角勢提督傅先宗往攻中飛子殞於陣傅軍不支退紮黨川鋪賊勢益橫頻攻強勇中營及振威前營之駐石坡梁者時各軍宰馬爲食皆主議退紮黨川文秀慮大東鄉之賊將乘虛犯董家山乃飭所部回防而自率親兵三百人入石坡梁防營助守十一日大風揚沙夜繼以雪賊挾全力來撲頭裹白巾衣服皆反著彌望盡白無可辨識該營官等棄壘潛遁比文秀知之賊已四面逼壘矣憤極率其親兵鏖戰約食時許力竭歿於壘同時殉者總兵鄭守南李其祥楊文林劉篤志副將盧才華王福昌參將吳明勝游擊陳東海都司李湘南張有才舒有貴及親兵百五十人事 聞文秀照提督例議卹並於死事地方建祠祀之餘均卹如官仍斬逃者以徇於軍

周惟遠浙江錢塘武進士康熙間任靖遠衛掌印守備能詩文援

筆立就曠懷高致吐棄一切其於學校雅意興作城垣公廨悉爲整理邑人至今頌之

王三錫北直涿州武進士康熙間任靖遠衛掌印守備性慈良創建培風書院士林頌之謀勇兼賅軍民咸服

王臣江南徽州武舉康熙間任靖遠衛前所千總尙氣節工詩善書坦直率易惠愛行伍卒於官喪葬一切悉賴守備周惟遠貲助之始獲歸里士林爲之痛惜焉

明月輝亳州人靖遠衛前所千總康熙四十年攝衛篆值歲荒月輝煮粥賑濟飢民全活甚衆軍政嚴肅

高餘慶字松齡湖南瀏陽人隸甘肅提督陶茂林部征髮捻回各逆積功保提督 賜號確勇巴圖魯同治二年茂林自陝援甘餘慶充先鋒解金縣圍同治三年十二月賊圍靖遠五閱月糧罄茂

甘肅新通志

卷六十一

職官志 將才

十

林駐省欲親往援餘慶毅然請代壯之俾率五營星夜進餘慶捲甲疾馳一晝夜抵靖南之焦家斜灘賊數萬來拒餘慶就灘尾而營出戰斬數百級步賊潰騎賊偵我兵少復四合死戰餘慶困重圍中苦戰逾兩時賊集益厚力不支死時十二月十三日也事聞優卹如例先是賊逼焦家斜灘餘慶見賊勢猛上書請救茂林統軍來援取道貢馬井被他賊牽制不得進比轉戰至而餘慶死賊中悍黨亦傷亡過半茂林乘勢進擊靖圍解

穆隆阿滿洲正白旗人同治初授靖遠協副將勇敢有智略甫蒞任值軍務倥偬穆隆阿整營規勤訓練軍容器械之盛一時行伍無與爲比五年九月東路賊數千擁城下穆隆阿馳入賊隊左右衝突莫敢當其銳賊駭走穆隆阿縱馬奔逐過山峽馬驚逸墜深澗中傷左股軍士下澗昇歸數日後忽張目歎數聲尋卒事 聞

優卹如例

張詩伯湖南人有勇略同治九年總督左宗棠駐平涼檄詩伯購糧於大蘆塘蘆塘居靖遠北峻嶺重厓盜出沒其間肆剽掠詩伯至探蹤邀擊馘賊以千計明年六月糧臺移靖遠詩伯以護勇單請益兵以行抵龍頭峴遇騎賊方迎戰而步賊又大至乃登山以避遣使乞救鄰村時苦熱兵渴不得飲憊益甚賊圍合詩伯挺鬪被執死之賊去檢其屍舌及雙目豁如蓋罵賊不屈爲所刳也事聞優卹如例

游道亨江西人康熙時由武進士任河州衛守備慈祥愷悌遺惠在民州人爲建生祠塑像奉之

新 柱河州副將乾隆四十六年撒拉回變總督勒爾謹遣蘭州知府楊士璣與新柱以兵往捕行至循化白莊逆黨大譟戕新柱

甘肅新通志

卷六十一

職官志 將才

十一

殲從兵擁土璣入起臺堡亦被害

李鴻轉河州副將乾隆四十六年回變城陷鴻轉死之

保 興滿洲人乾隆四十六年任河州副將時兵變甫息人心惶惑保興撫綏有才未期月而軍民咸定後陞河州總兵出征四川死教匪之難河民思其德立祠奉之

李日新同治初以總兵官管帶正字營駐紮河州回叛戰至積石關陣亡

常 有滿洲人同治初任河州右營游擊回叛督戰受傷未愈城陷衣冠坐堂上罵賊遇害舉室殉焉

賈忠孝四川人同治初署河州中營遊擊城陷力戰死之

羅洪順貴州人同治初署河州左營千總城陷巷戰死

李忠華湖北孝感人以副將度隴勦回逆同治七年春署陝甘總

督穆圖善督師進狄河忠華偕副將羅啟祥等率所部從七月勦太子寺巴燕溝回巢二十八日我軍方築壘賊逼柵門忠華整隊以待令軍士無少譁俟賊稍懈乃發巨礮擊之賊敗竄越日賊復率大隊來襲忠華力戰賊眾潰走乘勝追殺直抵賊卡守巢賊齊出敗賊亦回攻兵弁多中傷死思華冒矢石前進適槍子貫胸立殞先後血戰傷亡二十七員以狀聞得旨李忠華贈提督銜給騎都尉兼雲騎尉世職副將羅啟祥等優卹如例

傅先宗字崑亭湖北江夏人性忠樸好兵家言同治初多隆阿勦陝回先宗從總兵曹克忠入關度隴疊克賊巢收復城池均在事有功然猶偏裨也四年秋先宗統宗順五營復從克忠北勦解鹽茶廳圍克伯李村等處逆巢十二月逆回圍鞏昌先宗往援戰於樹坡寨太破之圍立解逐北至黑燄山賊落澗死坑谷皆滿遂壁

甘肅新通志

卷六十一

職官志 將才

十一

於通渭之馬營監未幾克忠遷提督引疾歸先宗接統其眾五年八月賊陷鞏郡紳募死士赴先宗營乞援先宗捲甲疾馳夜抵北門令軍士效賊裝以白布裹頭囊土填壕一呼登城賊不虞援軍猝至裸而出四望皆白巾迷惘狂竄自相踐踏爭奪門出門閉乃驅於城南聚而殲之無一漏網者先宗既復郡城出難民於鼓樓分軍糧賑之乃還厥後鞏人感其德鐫碑志之七年春先宗奉檄進勦狄道時賊踞渭源號稱十萬先宗率士卒騰踊爭入殺賊精銳三千人餘狼狽西竄諸軍乘之遂拔渭源城逼狄道是時渭源敗賊暨河州援賊皆集狄道城下與拱拜山逆寺相犄角先宗即率所部潛擣拱拜山擲火彈延燒及寺悍黨焦焉復自山下趨戰賊潰城亦克追至洮河賊溺死者萬餘論功授涼州總兵記名以提督用因創發乞歸逾年至隴仍統舊部紮狄道范銘勇潰掠

岷州先宗平之十年秋破高家集等逆堡明年正月攻太子寺之
新路坡夷傷我軍甚多先宗憤親執大旗撲賊卡賊惶駭欲遁忽
槍子洞先宗額遽卒事 聞優卹如例

平涼府

宋劉 豎瀘猶子涇原兵馬都監兼知德順軍第七將上柱國有瀘風

元李 進保定陽曲人爲侍衛親軍至元十五年移屯六盤山加武毅將軍賜金符

明姜永躍字起淵山東臨清人精騎射崇禎歲癸酉有寇警固原兵備陸夢龍遣永躍代理中軍事統營兵駐防靜甯甲戌八月賊大至時關城未守賊眾擁逼大城永躍諭守堞者無譁伺賊近城援弓射之賊應弦而倒始退去永躍以火礮尾擊賊大潰亂自相踐踏乙亥賊復掠州而過知城中守衛甚嚴更不敢犯當是時賊凡數經城得保全者永躍力也

國朝洪致祥湖南湘鄉人從征鄂皖累擢至總兵 賜號効勇巴圖魯

甘肅新通志

卷六十一

職官志 將才

十四

同治五年安肅道蔣凝學募安字五營援甘以致祥負材武委帶左營行抵平涼之馬涼鋪遇逆回掩至致祥首先陷陣斬悍逆數十賊披靡乘勝深入伏突起馬踣被執怒罵不屈賊斷其四肢死

事 閩優卹如例

楊 發陝西華陰人道光中隨軍西征以獲逆酋張格爾功授靜甯營守備洳任後訓練嚴明捐資開採炭礦未果檄調南征捻匪陣亡州人思之

伊米陽阿滿洲人同治初任靜甯營參將會逆回倡亂州治戒嚴伊米陽阿督率兵民登陴嚴守晝夜不倦目不交睫者凡數十日城賴以全謂之循公守法克勤厥職洵無愧云

鄭連拔字炳南湖南邵陽人英姿倜儻聲如霹靂由鄉兵出身所向有功歷保 記名提督光緒丁丑管帶武威前營駐防靜甯兼

署本營參將甫下車卽墾屯田巡隘地葺府廨繕城垣跨澗成梁
關山通道時陝民有逃荒至靜者連拔賑給寒衣災黎藉以卒歲
又於官道兩旁樹榆柳數萬株德洽輿情頌聲四起後陞西甯鎮
總兵官

周文翔湖南人性慈祥擔當有爲頗見幹濟初由軍功歷保至
記名提督光緒中文翔管帶精選軍駐防靜甯修築橋梁補葺城
池終歲勞苦殆無虛日嗣採州治之南山確有炭礦文翔親率兵
丁先後開鑿兩次礦苗均已發現惜山水暴發前功盡棄矣未幾
文翔卒士民歎惜者久之

固原直隸州

唐王海賓華州人官太子右衛率豐安軍使開元二年吐蕃寇隴右詔隴右防禦使薛訥等禦之以海賓爲先鋒殺蕃甚眾進戰長城堡諸將媚其功按兵弗爲接應海賓戰死帝憐其忠贈左金吾大將軍

宋任 福字祐之開封人仁宗初元昊寇渭州韓琦乃趨鎮戎軍盡出其兵福爲環慶副總管遂將焉以涇原都監桑懌爲先鋒諜云敵兵甚少福乃易之深入六盤山而不知元昊伏十萬眾以待也福身被十餘矢小校劉進勸福自免福曰吾爲大將兵敗以死報國竟力戰槍中左頰絕其喉而死子懷亮同殉於陣又見慶陽名宦

劉 滄字子濬保塞人仁宗時爲渭州瓦亭砦監押擊破党留等

甘肅新通志

卷六十一

職官志 將才

十六

族獲牛馬萬計屢有戰功贈忠烈侯詳見平涼府名宦

桑 懌雍邱人景祐中爲閤門祇候會平蠻獠有功以次及懌不受或譏其好名懌曰若避名則善皆不可爲矣慶厯初元昊寇邊時官涇原都監爲先鋒與任福同戰事循好水川出六盤山下距羊牧隆城五里寇設伏兵待之懌於道旁得銀泥合封襲謹密中有動躍聲疑莫敢發福至發之乃懸哨家鴿百餘自中起盤飛軍上寇聞之伏兵四起懌衝鋒酣戰自辰至午力竭而殉

劉 肅慶厯初官鎮戎西路巡檢元昊寇邊肅合任福軍遇於捺龍川會戰於六盤山與桑懌同殉陣焉

葛 霸眞定人都指揮使改邠甯涇原環慶三路都部署雄毅善戰

葛懷敏霸子也慶厯初爲鎮戎軍副總管元昊寇鎮戎懷敏督諸

砦兵禦之分四路趨定川砦寇毀橋斷其歸道四面圍攻乃退守
長城壕路已爲寇所據遂及將校許思純劉賀張貴向進劉湛趙
瑜李知和王保王文李岳趙璘李良臣孟淵趙珣十四人同死
曹英慶歷初知鎮戎軍時元昊入寇從葛懷敏戰於定川砦死
於難

張綸字公信汝陰人仁恕有才略知鎮戎軍後知秦州

劉鈞開封人監鎮戎軍兵馬慶歷中與子堯卿戰死於好水川
明白文德綏德人爲西安州遊擊愛兵恤民公私給足民爲勒石以
頌其德

王鎮字世安本所千戶慷慨有節忠勇素著宏治間虜寇犯邊
率師禦之戰歿於陣朝廷褒忠錫蔭鄉里勒碑表節

王晉鎮之子也猿臂善射破賊平番屢立奇功歷任左府都督

甘肅新通志

卷六十一

職官志 將才

十七

僉事

楊宏字希仁海州人正德初以都指揮僉事領兵固原好學有
謀士皆感恩時楊一清總制三邊宏獻策以紅古城乃北方必由
之路宜築城鑿池募眾屯田甫閱月軍士雲集築邊牆數百里
張鳳榆林衛人固原總兵戰亡於鶉鴉峽詳見蘭州府將才
梁震榆林衛人嘉靖初任固原總兵十二年冬虜犯鎮遠關總
制唐龍遣震與王効擊之虜多溺死旣而復犯花馬池大捷於乾
溝歷遷延綏大同總兵卒諡武壯

王効延綏人嘉靖中任固原總兵與梁震擊虜有功

任傑西安左衛人嘉靖中任固原總兵時濟農侵黑水苑入固
原標掠總制劉天和飭傑往戰前總兵周尙文盡銳奮擊遂與傑
共斬小王子更築鐵柱泉於靈州境

孫 贍綏德衛人任固原副總兵嘉靖中禦流寇戰歿子傳楫傳
潛萬厯中均陣亡父子忠義人樂道焉

曹世忠綏德衛人嘉靖三十六年官固原總兵加都督僉事捐廉
與兵備道沈圻合修東嶽山行祠道路俾崎嶇易以平坦民思利
便鐫碑頌之

郭 江延綏人以指揮厯官固原總兵嘉靖間巡閱屯軍遇虜戰
於定邊死之賜祭葬勅建憫忠祠得世襲指揮

張 剛榆林衛人以世襲指揮厯陞固原總兵多謀善戰料敵無
遺策邊寇畏之

王撫民延安衛人指揮使高山逋寇爲亂甫至境撲滅之火節寇
聞其威令不敢犯邊者數年以固原總兵遷右軍都督同知

蕭如薰延安衛人好義潔已敬土恤民任固原總兵署都督同知

甘肅新通志

卷六十二

職官志 將才

十八

其祖漢父守奎兄如芷如蘭如蕙均官總兵有政績一門名將當
時豔羨亦古今所罕有已

管一方山西中屯衛人任固原總兵潔已恤貧民頌其惠

高從龍榆林人任固原參將崇禎中調征流寇行至三水遇賊戰
死諡忠勇

唐調鼎武驤衛進士爲西安州遊擊崇禎末率兵防守固原中軍
董千總與寇通開城納之大肆擄掠調鼎聞警計擒董弁及首謀
數人勒兵進剿羣盜授首民賴以安

國朝郎兆龍河南人雍正初由武狀元改藍翎侍衛任固原提標後營
守備能文有爲邑紳撰銘可考

鐵 保滿洲人乾隆十一年任固標右營遊擊營兵童文耀等以
索糧謀叛鐵保聞警乘夜與左營游擊任舉傳隊搜捕賊奔逸出

西門鐵保遂力堵之發手槍轟擊俘賊甚眾亂遂靖
呂興周咸豐中任固原城守營守備同治元年殉難

富克德額滿洲人咸豐間任固標右營遊擊同治二年回亂死於
難

景 文滿洲鑲黃旗人同治元年以定遠營遊擊署固標中營參
將二年正月朔日逆回猝起內外游匪勾結景文被執去置閤室
中遂遇害事 聞賜卹如例時同殉者中營把總周紹湯張官揚
郭繼堂經制蔣大勳惠連魁世職紀克昌紀克耀孫國柱石麟李
朝剛徐光道朱玉鋒鄔秉鋒龐在清諸人亦附請例卹焉

穆爾庚布滿洲人同治元年以安遠營都司署固標左營遊擊二
年元旦回匪驟變穆爾庚布方由 慶祝宮行禮畢即公服迎戰
中矛墜馬殉於陣同時死者如李長華趙大陞祁永茂陳孝鄭玉

甘肅新通志

卷六十一

職官志 將才

十九

城陳廷弼海明朱世祿劉明王世祿傅文和傅永泰李能盧學惠
連登陳起雲韓元秀白玉孫科甲孟言仁等二十人均爲標弁疏
上 賜卹如例並於昭忠祠附祀焉

福 長滿洲人同治元年臘月調固標後營遊擊甫蒞任卽邁二
年正月朔日逆回之變時由 慶祝宮獻歲禮成未及歸署而烽
火已肆熾矣福長上馬迎堵槍中左額而歿其標下弁兵護其遺
骸一時被殺者則有把總馬俊王鳳林經制何占魁城守營把總
蒙永福後營馬兵王昌明韓遇源苟茂春常逢春吳珍張宗魁王
丕林高仕和党成富王永清等十餘人事 聞卹典優加

王有慶湖南人歷保副將同治初駐防隆德固原境內司餉運以
探賊巢路徑與同軍李松林均被戕於野雞峴其時隆德縣周其
俊亦與難焉事 聞並蒙優卹

熊觀國四川人以軍功歷保花翎副將同治四年隨提督雷正綰由開城進攻固原取道西南城下時逆回馬得力等猛鷲飛石擊彈聲動山谷諸將如李廣珠劉大貴等咸稱奮勇惟觀國尤爲驍勁語軍中曰今日之舉背城一戰耳遂肉薄獠升力奪卡隘旋進步旋被創受矛刺者十餘傷而觀國弗顧也比登陴拔賊幟忽礮中頭顱隕於城下而死同死者都司陳廷高把總郭鳳林二弁觀國旣殉李廣珠等忿不可遏遂勇進而固城報克事 聞觀國追贈總兵建專祠廷高鳳林附祀之

田景泰河南人同治六年以卸任固原城守營遊擊禦賊於五里鋪鏖戰三晝夜力竭而殉千總張鵬飛亦陷於陣事 聞優卹如例並入昭忠祠附祀焉

王雲鵬字翼翔湖南甯鄉人累保花翎遊擊智勇兼備同治八年

甘肅新通志

卷六十一

職官志 將才

二十一

爲提督周紹濂巡捕官九年秋降酋馬天法復叛殺提督丁賢發紹濂往撫之雲鵬力諫弗聽比至滿四川天寒士飢眾方謀炊賊猝至我軍未及陣敗退紹濂馬仆不能行雲鵬以所乘貽紹濂而徒步從屢蹙傷足泣告紹濂曰鵬從公十數年今至此犬馬之力竭矣請公速行他日幸收吾骨也言畢坐道旁賊至殺之事 聞優卹如例

丁賢發字良臣湖北孝感人由軍功累保提督 欽賜伊勒達蒙額巴圖魯勇號同治九年統宣威三營守韋州時降酋馬伯森守預旺多騾馬賢發因糧不繼督帶中右兩營如預旺借資餉運命大隊駐黑風溝距預旺僅二十里自率副將楊正華等五十餘騎旣入城降酋馬天法疑其將殺己也立叛賢發與戰肘受礮傷正華從之身無完膚猶手刃數賊而死惜乎寡不敵眾且深入巢穴

正華及弁勇等均殺傷過當遂遇害賊騎出而大隊在黑風溝者又疑其來迎賢發而失道也我軍且戰且走死者又百餘人詳忠義錄表事 聞優卹如例

潘錫齡湖南甯鄉人歷保花翎留浙補用遊擊勇敢樸誠同治九年回亂殉於平遠之王家團事 聞賜卹如例

田榮曉湖南常德人由軍功累保守備隸提督左日升部爲差弁時金積未平陝回常出掠日升率隊擊之飭總兵張九元由惠安襲其後遇賊於韋州堡之苦水河戰敗榮曉身受重傷洞穿其腹猶扶創力戰死之事 聞賜卹如例

耿邦賢直隸定興人由武進士任西安州遊擊嚴而有節鎮撫三年兵馴民安

劉甫田字葭卓湖南甯鄉人由軍功薦保總兵 欽賜赫勇巴圖

甘肅新通志

卷六十一

職官志 將才

二十一

魯勇號同治八年隨提督周紹濂運餉駐同心城偵者忽報逆首白彥虎糾合河回萬餘將撲城甫田亟迎頭奮擊之斬馘數十級以無應援者殉於陣從騎皆戰歿事 聞優卹如例明年紹濂復至同心城遇乘馬者馬哀嘶不已諦視之乃甫田所乘馬也知爲賊鞫之得甫田屍於枯井中齒牙豁如蓋遇害時罵賊被鑿也遂磔是賊以祭之

馬德順字佑庵河南洛陽人咸豐初以征髮捻各匪稱爲名將擢

浙江處州鎮總兵 欽賜碩敦巴圖魯勇號同治初隨總督左宗

棠來甘以肅清回逆爲己任每戰必先進攻西安堡

即今海城
西安州地 德

順督率馬隊擊敗賊眾平毀賊巢諸將請收隊德順弗許復率四十騎與副將張顯揚奮力追擊行至劉家井一賊持矛來迎一賊擐旗尾後德順發槍持矛賊落馬旋躍起馳去獲擐旗賊詢之知

持矛賊乃白彥虎也乘勢猛追伏賊突起德順被亂矛所刺者七
創猶格殺數級力竭殉於陣事 聞賜諡武毅建專祠廕襲如例
其幕友金熙彬同遇害

張顯揚河南人初由軍功歷保副將同治初隨攻西安堡追賊至
劉家井殉於陣同時死者都司張成進董萬清熊天起把總楊大
鵬沈鴻徐壽喜李大榮姚先成等九人事 聞優卹如例並於馬
德順祠附祀

施 鵬陝西定邊人官撫標參將同治初因事逮職提督雷正綰
檄領步隊五百人屢戰有功復原官旋以鹽茶廳即今之海城縣圍急提
督曹克忠遣鵬往援行至鴉兒灣突遇羣賊峰擁而來鵬督隊奮
擊忽礮中左臂猶裹創血戰手刃數賊而歿事 聞優卹如例

高如岡山西繁峙人咸豐中由武舉授千總歷陞鹽茶營都司同

甘肅新通志

卷六十一

職官志 將才

一二十一

治元年以疾解任聞陝回倡亂警報曰急留廳爲死守計二年二
月逆回撲城都司趙喜率兵出戰如岡力疾登陴與同知莊裕崧
督團嚴守會喜兵爲賊所敗賊蟻附登城如岡奮力堵擊殺悍賊
十餘名已而賊愈眾遂戰死時年逾七十其子武生萃中及其壻
附生張守一均隨如岡巷戰惜眾寡不敵同死之事 聞並蒙優
卹

魏紀鑿字堅甫湖南邵陽人歷保花翎湖廣補用總兵硃色巴圖
魯同治九年管帶武威前營駐防海城奮勇盪抉擒斬賊目甚多
民賴以蘇十一年往勦環縣逆回殉於陣同時遇難者湖南宜章
人參將楊石泰湖北鄖西人都司喬秉祥江西南康人都司蕭國
才湖南益陽人千總陳明道湖北鄖縣人把總瞿正魁及陝西撫
回陝得榮等六人事 聞均 賜卹如例

賈洪順由軍功歷保守備同治初禦回匪於打拉池冒險衝鋒忽中礮子穿貫胸膈殉於陣同軍守備胡應芳亦被戕事 聞並蒙優卹

苟德洪四川德陽人同治二年投湘果營勦陝甘回匪累功保總兵七年統領蜀軍黃鼎以所部攻金積堡德洪請從嘗奮身爲諸軍導八年九月十八日禦賊於打拉池督隊猛擊受傷陣亡事聞優卹如例初德洪父興祿早喪母李氏爲娶婦生子有基德洪死母年六十餘有基襲世職奉祖母以終其年

成光裕字吉甫湖南甯鄉人由行伍歷保提督 欽賜直勇巴圖魯勇號光緒三年借補固標中營參將兼帶練軍中旂步隊整釐戎政明幹有爲在任十八載嘗與各營合力種樹以興地利旋卒於官

甘肅新通志

卷六十一

職官志 將才

一二十三

穆振鐸字木天陝西長安人以世襲雲騎尉歷保副將借補平涼營游擊光緒十八年署固標中營參將兼帶練軍中旂步隊治軍處事有幹濟才戎幄中以能將目之

化平直隸廳

國朝喻勝榮由提督統領平江營兼帶關山防軍陷陣衝鋒戰功聿著
同治九年率隊駐防化平紀律嚴明巡防八載盜弭民安築城建
廟創修文武衙署皆勝榮督兵締造毫不累民又捐款創立書院
經總督左宗棠顏其名曰歸儒並置鋪房七間水磨二輪以每年
所獲賃資充作生童膏獎之需士林感德至今弗忘

涇州直隸州

晉胡 崧愨帝建興四年漢劉曜逼興安安定太守焦嵩新平太守竺恢引兵來救皆畏漢兵強不敢進相國保遣胡崧入援擊曜於靈臺破之

姚 興後秦苻堅時人興父萇命鎮陰密

北魏崔延伯博陵人太和中爲統率謀勇過人除征虜將軍副蕭寶寅討万俟醜奴宿勤明達等會安定甲卒十二萬鐵馬八千軍威甚盛醜奴營涇州西北四十里党原城延伯常乘勝逐北遂伐木造大排聯鑱強兵負而趨號曰排城騎外翼以居輜重自涇州升原攻賊賊數百騎詐降寶寅延伯惑之宿勤明達率眾急攻東北降賊乘高西下夾攻延伯力戰敗之追造其營賊乃以輕騎反陷排城延伯軍大敗死傷幾二萬寶寅退保涇州延伯修器械購驍

甘肅新通志

卷六十一

職官志 將才

一二十五

勇復自涇州進攻賊彭阡谷柵七里結營不俟寶寅之師身襲賊大破之平數柵軍乘利散掠賊乘亂奮擊反大敗射殺延伯士卒死者萬餘延伯善撫士得眾心勇冠諸軍旣死朝野哀之李世哲穎邱人性豪侈頗有將才爲三門別將有功遷涇州刺史侯莫陳崇字尙樂代郡武州人万俟醜奴奔高平崇北逐涇州單騎入賊中擒醜奴獲其眾封臨涇侯

唐劉海賓爲涇州將劉文喜作亂圍久不克徵發餽運內外騷然朝議請赦文喜德宗曰微孽不除何以令天下海賓入奏請自効帝許之海賓與其守說諸將共誅文喜傳首京師

何明禮爲涇原將與段秀實謀誅朱泚迎乘輿不克死之岐靈岳涇原將吏朱泚叛遣韓旻將銳兵三千聲言迎德宗實襲奉天司農卿段秀實曰事急矣使靈岳倒用司農印詐爲姚令言符追旻

還因擊泚不克俱死之

楊 岌涇州都統燕王李藝反岌勒兵攻之藝眾潰斬首送長安
康季榮宣宗大中三年吐蕃以三州七關歸附季榮復渭州原州
安樂州石門驛藏木峽制勝六盤石峽關及温池鹽池改安樂爲
武州復邠甯蕭關涇原賞絹六萬疋其鹽利以贍軍腴田以業民
五年輸稅

宋趙 振字仲威雄州人以破夏人功遷涇原都監子珣瑜工騎射
皆擢通事舍人珣年十六爲招討都監予兵萬人令自擇裨貳屯
涇原

趙 珣振子爲緣邊巡檢使涇原路招討都監屯涇州兼治隴干
城麻氍黨留百餘帳處近塞爲暴珣引兵自靜邊襲擊俘獲數千
計瞎氍居龕谷無所屬珣與書招之瞎氍聽命元昊入大府檄珣

甘肅新通志

卷六十一

職官志 將才

一二十六

會葛懷敏於瓦亭珣曰夏恃眾遠鬪鋒銳盍依馬欄城布柵以扼
其路守鎮戎城以便餉道俟其衰擊之否則必爲賊所屠懷敏不
聽珣戰歿

高 敏登州人爲涇原指揮使數與夏人力戰中創韓琦范仲淹
薦之爲閤門祗候

王 珪開封人爲涇州駐泊都監康定初元昊寇鎮戎軍珪將三
千騎爲先鋒自瓦亭至獅子堡敵圍之數重珪奮擊披靡獲首級
爲多語其下曰兵法以寡擊眾必在暮我兵少乘其暮擊之可得
志也復馳入有驍將持槍直珪胸傷右臂珪左手以杵碎其腦繼
又一將以槍進珪挾其槍以鞭擊殺之一軍大驚遂引去是歲改
涇原路都監明年爲本路行營都監尋至黑山焚敵族帳獲首級
馬駝甚眾會敵大入兵五千從任福屯好水川連戰三日福陷圍

中珪獨入殺數十百人鞭鐵撓曲手掌盡裂奮擊自若矢中目乃還夜中卒邊人立祠祀之

武英字漢傑太原人仁宗時爲涇原行營都監與任福合諸將戰張家堡斬首數十百敵棄羊馬僞遁諸將皆趨利爭進英以爲前必有伏眾不聽伏發福等旣敗英猶力戰自辰至申矢盡遇害贈邢州觀察使

李緯楚邱人爲涇原都監夏人大舉入寇緯將禦之而帥司遣援兵將郭志高逗遛諸將度眾寡不敵不敢出緯坐重責子師中年十五言時政詣宰相呂夷簡辯父無罪數詰難不屈且曰師中爲父辯非爲己也自是知名舉進士

劉昌祚字子京真定人元豐四年爲涇原副都總管詔與姚麟率番漢兵五萬出葫蘆川多斬獲後知渭州州地宜牧養故時弓箭

甘肅新通志

卷六十一

職官志 將才

一二十七

手人授田二頃有馬者復增給之謂之馬口分地其後馬死不補而據地自若昌祚按舉其法不二年耗馬復初遷指揮使昌祚善騎射箭出百步之外夏人得箭以爲神持歸事之所著射法行於世

張吉延安人爲涇原將解宣威城圍力戰死之

曲端字正甫鎮戎人父渙任左班殿直戰死端三歲授三班借職警敏有文武才略爲涇原路第三將夏人寇涇原帥司統制李庠與端禦之庠屯柏林堡不備爲夏人所襲兵且潰端力戰卻之振旅還餘詳固原直隸州鄉賢

鞏昌府

隋慕容三藏燕人開皇十五年授疊州總管党項羌時有反逆三藏隨時討平之部內夷夏咸得安輯又詳西甯府循卓

宋种 諤字子正洛陽人熙甯中知岷州董氈將鬼章聚兵洮岷新羌多叛諤襲擊破之皆出塞收洮州

趙彥呐彭州人嘉定十二年西和州新被兵制使安丙檄使彥呐經理金人再至戰卻之在州五年得軍民心

金完顏哈達正大二年駐兵鞏州田瑞反哈達討之促諸軍進攻且移文諭叛者曰罪止田瑞一身餘無所問不數日瑞弟濟殺瑞以降哈達如約撫定一州民賴以安

完顏仲德海蘭路人正大六年移知鞏昌府兼行總帥府事時諸郡殘破仲德招集散亡得軍數萬依山爲柵屯田積穀人多歸焉

甘肅新通志

卷六十一

職官志 將才

一二十八

號令明肅路不拾遺

明馬 華字德輝六合人洪武時掌岷州衛指揮賦性嚴毅才兼文武始築東西二城立樓置門伐木通道繕甲兵練士卒建學校衙署橋梁烽堠營堡郵驛倉廩壇廟之屬以次修舉十五年夏羌戎爲亂上命率西安五十衛步騎二萬直抵疊城討之殲五千餘衆番羌聞聲竄伏邊境以安陞陝西都指揮使

金朝興南京人忠勇多謀有儒將風洪武十二年從西平侯沐英討洮州番朝興首取甘朵降其萬戶又追斬積石州土官阿昌七站土官失納等遂平番亂築洮城晉秩宣德侯其弟鼎興建興後俱授衛指揮使因家於洮後從征雲南戰歿

李 達字時中定遠人永樂元年以都督僉事鎮守洮州撫安軍民恩威並著洮地僻近邊民皆勁悍不尙儒術達奏建儒學以興

文教督屯墾修城墩撫招生番內附奏給金符每歲納馬遂爲定制

韓 春以河州衛指揮使任岷州守備勇略絕人羌番畏服修葺學宮並南城門若疊藏長橋實自春創建焉

朱 憲由武進士守備岷州隆慶六年奉命征番深入賊巢斬獲過當回營時爲伏賊所得歎曰大丈夫死於疆場夫復何憾遂自刎死

李聯芳字南園山西汾陽人忠勇有膽略萬曆二十九年岷番六忍力節二族叛聯芳爲洮岷協率兵討平之後青海番數犯甘涼西甯洮岷間已而圍舊洮城聯芳迎擊戰歿

李國柱爲洮岷協副總兵萬曆四十五年番部犯舊洮時以番帳羅列偵探不能遠及烽火失傳賊夜半猝至戍卒近番者罹害甚

甘肅新通志

卷六十一

職官志 將才

二十九

慘國柱率兵奮擊殺賊甚衆番始遁去

國朝傅先宗同治二年從曹克忠度隴規復鞏昌拔狄道渭源城詳見蘭州府將才

常 德滿洲鑲紅旗人官四川游擊同治四年川北鎮總兵鶴齡帶兵援甘德解運餉精次年駐防鞏昌八月城陷德督隊巷戰斬數十人至北門賊蟻集力戰歿事 聞贈參將銜蔭襲如例

談保和伏羌縣典史保康弟江蘇武進縣人性忠蓋有膽略同治二年奉檄援伏羌時賊逼城下保和率團兵奮擊抵東郊賊誘入狹巷援應不至力竭被害民瘞尸於南山麓立祠於縣西街祀之高 孟由行伍官千總康熙十四年恢復平涼秦州西禮等處屢立戰功歷陞延綏總兵

陳 英少有勇略康熙十四年由行伍恢復蘭州西禮等縣身先

士卒屢有摧鋒破敵之功授都司僉事
劉繼祖順治三年任洮岷道標中軍守備五年回匪作亂繼祖率
兵巷戰力屈死之

馮光明貴州人驍勇多謀善撫士卒同治四年授洮岷協副將時
洮爲回據光明次岷州蟬洞堡從間道抵卓尼招集兵丁駐紮東
鄉日與賊戰不利迨五年春提督曹克忠收復洮州光明入城兵
不滿二百誓與城共安危後因都司丁永安挾仇串賊遂被害

松 明旗人少負奇氣以副將揀發直隸調甘肅同治六年署總
督穆圖善檄權洮岷協副將時回逆肆擾民皆危懼多他適者松
明多方開導集紳耆激以義勇然卒不能悟率縮繩於腰爲縋逃
計未幾賊大至薄城下松明率士民登陴嚴守常冒雨巡壁壘間
由是感寒溼疾大作忽一日呼心疼仆地昇至公廨越一日死事

秦州直隸州

南北朝魏封勅文代人始光初爲鎮西將軍秦益二州刺史賜爵天水公鎮上邽詔率步騎七千征吐谷渾慕利延兄子拾歸於枹罕衆少不能制詔遣安遠將軍廣川公乙烏頭等二軍與勅文會隴右軍次武始拾歸夜遁勅文引軍入枹罕擄拾歸妻子及其民戶分徙千家於上邽金城邊回天水梁會謀反煽動秦益二州雜人萬餘戶據上邽東城南城攻逼西城勅文先以設備殺賊百餘人賊乃引退回會復率衆四千攻城氏羌一萬屯於南嶺休官屠各及諸雜戶二萬餘人屯於北嶺爲回等形援勅文遣二將領騎二百設備門內別令騎出擊之大破賊衆斬回而復擊會勅文謀於衆曰困獸猶鬪而況於人賊衆知無生路人自致死必傷士衆若開其生路賊必上下離心克之易矣衆咸以爲然又招降賊衆六

甘肅新通志

卷六十一

職官志 將才

三十一

百餘人會知人心沮壞於是分遁勅文縱騎躡之死者大半俘獲四千五百餘口略陽王元達因梁會之亂聚衆攻城招引休官屠各之衆推天水休官王宦興爲秦地王勅文與臨淮公莫真討之軍次略陽乃部分諸軍三道並攻賊出營拒戰大破之俘三千人
天安元年五月卒

呂羅漢幽州人父溫字晞陽爲秦州司馬有治名羅漢仁篤慎密弱冠以武幹知名父溫之佐秦州羅漢隨侍隴右氏楊難當率衆數萬寇上邽秦民多應之鎮將元意頭知羅漢善射共登西城樓令羅漢射難當隊將及兵二十三人應弦而殪賊衆轉盛意頭卽簡千餘騎令羅漢出戰羅漢與諸騎策馬大呼直衝難當軍衆皆披靡殺難當左右隊騎八人難當大驚乃引還仇池徵爲羽林中郎上邽休官呂豐屠各王飛廉等八千餘家據險爲逆詔羅漢率

騎一千討擒之後爲鎮西將軍秦益二州刺史時仇池氏羌反攻逼駱谷鎮將吳保元走登百頃請援於羅漢羅漢帥步騎掩擊大破之斬其渠帥賊衆退散詔加勞勉疊破涇州叛民張羌郎及仇池叛羌蛩廉符祈等皆斬擒之秦益阻遠諸羌恃險數叛自羅漢涑州撫以威惠西戎懷德土境帖然高祖復詔美之徵拜內都大官卒賜命服一襲諡曰莊公

周梁 臺字洛都長池人父去斤魏獻文時隴西郡守臺少果敢有志操孝昌中從爾朱天光討平關隴大小二十餘戰以功授子都督賜爵隴城鄉男普泰初進授都督後隸侯莫陳悅討南秦州羣盜平之悅表臺爲假節衛將軍進封隴城縣男尋行天水郡事治有聲績天光敗賀拔岳又引爲心膂岳爲侯莫陳悅所害臺從太祖討破悅又拜天水郡守性疏通恕以待物至涑民處政尤以仁

甘肅新通志

卷六十一

職官志 將才

三十一

愛爲心

宇文虬字樂仁代武川人魏孝武時累從獨孤信有戰功大統七年除漢陽郡守又從獨孤信討梁企定破之

唐竇 軌字士則岐州平陵人從義兵平京城武德元年以討稽胡功授太子詹事會赤排羌與薛舉叛將鍾俱仇同寇漢中拜秦州總管與賊連戰皆捷餘黨悉降進封鄴國公

宋石 曦并州太原人建隆三年遷左驍衛大將軍護秦州屯兵西人犯邊率所領擊破之斬渠帥十三人

任 福字祐之開封人以衛士厯官知隴州元昊反擢秦鳳路馬步軍副總管詔增城壘器械受命四十日而戰守之具皆備餘詳固原州將才

郭 遵開封人爲秦州三陽砦主後從劉平與夏人戰深入多殺

所向皆靡敵攢射之馬蹶被殺

張守約字希參濮州人歐陽修薦其有智略知邊事歷官秦鳳都監居職六年括生羌隱土千頃以募射手築峽石堡甘谷城第功最多夏人萬騎來寇守約適巡邊與之遇不解鞍簡兵五百逆戰衆寡不侔勢小卻夏人張兩翼來守約挺身立陣前自節金鼓發彊弩殪其酋敵遂退遷熙河鈐轄仍統秦鳳羌兵駐通遠河州羌屯敦波守約渡洮水擊破之後徙秦鳳副總管領康州刺史夏人十萬屯南牟畏其名引去

郭 恩開封人以内殿承制爲秦鳳路兵馬都監開古渭州路前鋒斬首九百餘級會掌馬族叛又率兵討破之累功補崇義使爲秦隴路兵馬鈐轄徙并代州鈐轄

賈 逵真定藁城人以戰功歷官秦鳳路鈐轄秦山多巨木與夏

甘肅新通志

卷六十一

職官志 將才

三十三

人錯壤逵引輕兵往來伐羌酋馳至畫地立表約決勝負逵引弓連三中的酋下馬拜復從逵取盈而歸後管麟府軍馬復徙秦鳳去之十日而代者郭恩敗朝廷以逵爲能擢捧日天武四廂都指揮使

燕 達字逢臣劉舜卿字希元皆開封人達以戰功爲秦鳳路總管討破河州羌遂降木征遷東上閤門使舜卿亦由知原州改秦鳳鈐轄襲擊西市城先登有功遷皇城副使

楊 政字直夫原州臨涇人建炎間從吳玠擊金人九戰九捷累功至忠顯郎紹興二年陞隴州團練使移知方山後選知鳳州又改知熙州屢敗金人多戰功歷官至武當軍節度使加檢校少保拜太尉卒諡襄毅餘詳涇州羣材

劉 宣爲秦鳳路兵馬都監金人入關陝宣遣蠟書密與吳玠相

結且率金將任拱等以所部歸朝約日已定有告之者金人取宣
縷擘之

楊從義字子和鳳翔人紹興十二年以本部兵屯仙人關鎮守二
十年保固無虞轉宣州觀察使

元陳 祿中統中便宜都總帥參謀宣授徽州管軍元帥耿介寡合
嚴明好禮

田守節至元中爲元帥守栗亭土番不敢近

田守琮大德中徽州管軍副都元帥邊境以安

楊文廣太原人爲徽州管軍副都元帥務廣恩信軍民懷服屢建
奇功

卜朝瑛卜光輔皆大德中徽州管軍千戶朝瑛與弟朝珪俱有威
名光輔值賊蠡起帥親軍驍勇者斬關入戰賊奔退

甘肅新通志

卷六十一

職官志 將才

三十四

張仲壽大德中徽州管軍元帥剛勇有謀屢立戰功

明徐 甯禮店所百戶正德中征蜀賊於徽州四條嶺賊多被圍左
右勸之遁怒曰是不武也力戰死之

杜居陽萬全人崇禎十三年囉寇盤據劫掠督兵臨崖攻圍旬日
破其穴滅之

國朝郭鎮都字清寰永昌衛人順治八年任秦州遊擊治軍嚴整而濟
之以寬甚得士心常登卦臺見伏羲廟圯壞捐貲重修視前加壯
麗焉

富成台清阿皆滿洲人嘉慶五年六月均隨大營勦教匪至徽成
率數騎探賊蹤遇賊伏家鎮力戰被重傷馬陷稻畦被害清阿官
大馬營遊擊戰歿伏家鎮之橫渠溝俱奉 旨照副將陣亡例賜
卹入祀秦州昭忠祠

饒得勝湖北孝感人從征鄂皖有功同治二年西征隸陝西撫標左營升副將 賜號協勇巴圖魯三年隨曹克忠剿靖遠叛回克之賊竄鞏昌馬營餉道梗得勝奉檄防禦運道復通擢總兵四年九月剿洮州賊得勝督河鎮各營剋日薄城下然礮裂城一角鼓而入與賊鬪於衢巷俄聞西南角礮聲知援至麾軍衝殺內外夾擊賊大潰城克旋克鴛鴦觜六年借補涼州游擊七年剿米拉三溝連夷賊柵擢提督八年四月署總督穆圖善遣攻秦州回堡敗賊於四十里鋪越二日賊大至得勝分軍爲三自率中軍以其營弁將左右約之曰互相援毋稍卻賊分衆掩左右而以銳卒當中軍得勝發勁弩巨礮軍士回顧者斬賊不支方欲退而左右潰乃併擊中軍得勝腹背受敵遂被執賊寸鬻之事 聞優卹如例

王得勝字虎臣湖南人初隸楚軍髮逆有功後歸提督曹克忠

甘肅新通志

卷六十一

職官志 將才

三十五

節制度隴討叛回以功補河州鎮總兵未涖任同治五六年駐防秦安時已爲統領所部皆精銳屢與賊戰賊甚憚之呼得勝曰王老虎河西川之戰聲震山谷賊卒敗退及得勝移軍去次年冬秦安北郭失守人追思王軍保衛之功每歎息不置云後因事註誤爲道士居陝省八仙庵以終

楊德潤陝西富平人明幹有膽略自趙必達時與把總崔鳳鳴襄理防務有功郭逆之圍城德潤夜縋城出間道走秦州乞師後常率義勇東守永甯南鎮大石碑土匪冒賊剽掠者皆捕殺之縣令古一忱倚任之尤至故頻戰皆報捷事平升署清水知縣鳳鳴固原人也爲趙必達練勇教戰法守城極勤力一忱防剿之績鳳鳴助亦多云

馬忠臣三岔把總同治二年九月髮逆曹佩時由兩當竄利橋都

司袁學德擊之粉坪賊遂趨三岔城南忠臣與州判楊城率民兵
晝夜堅守垣墉圯缺鉛藥又不給十月初六日城陷忠臣與賊巷
戰不勝皆死之事 聞忠臣贈千總城贈都察院經歷廳民爲建
二忠祠歲時祀焉

階州直隸州

前趙田 崧字子岱仕趙爲仇池鎮將楊難敵襲仇池城陷被執左
右令崧拜崧叱曰安有天子牧伯而向賊拜者乎難敵字謂之曰
子岱吾當與子終定大事子爲劉氏可謂盡心得不盡心於我乎
崧厲聲曰賊氏何敢妄冀非分吾甯爲國家鬼豈可爲賊臣顧排
一人奪刀前刺難敵不中遂爲所殺

北魏穆 亮字幼輔代人卓有風度皇興中除仇池鎮將時階陵比
谷羌董耕奴斯卑等率衆數千寇仇池屯陽遐嶺亮副將楊靈珍
擊破之氏豪楊卜自延興以來從軍征伐身經二十一戰前來鎮
將抑而不聞亮表卜爲廣業太守豪右咸悅境內大安亮德望兼
資累官至尙書令餘詳大吏傳

皮 喜豹子子也孝文初以平西將軍討吐谷渾拾寅卽拜使持

甘肅新通志

卷六十一

職官志 將才

三十七

節侍中都督秦雍荆梁益五州諸軍事開府仇池鎮將喜至申布
恩惠夷人大悅酋帥率戶歸附置廣業固道二郡以居之太和元
年宋葭蘆戍主楊文度遣弟鼠據仇池詔喜率衆討之進次濁水
遣平西將軍楊靈珍擊文度所置仇池太守楊真真衆潰喜遂軍
於覆津部分將士擊走文度將强大黑追奔西入攻葭蘆城拔之
斬文度傳首京師南天水民柳旃據險不順喜又討滅之後爲豫
州刺史卒

元 英字虎兒孝文帝時遷仇池鎮將以漢中有可乘之機表求
進討師次沮水齊將蕭懿遣尹紹祖等緣山立柵隔水爲營英簡
兵三面破之在仇池六載甚著威惠

後唐田 武字德偉大名元城人清泰間爲成州防禦使性鯁直馭
軍治民咸盡其善

宋關師古紹興間金人攻關輔巨盜充斥川陝宣撫使盧法原嚴爲備禦自洮岷至階成師古主之屯通川文龍威茂劉錡主之屯巴西前後屢捷

劉 祿文州守將按竺邇破宕昌殘階州攻文縣祿困守數月不下蒙古謀知城中無井奪其汲道率勇士梯城城破死節

楊 必嘉泰間元兵破武休下興元小校張鉞以其徒潰入文州殺守臣楊必復將自龍趨綿以闖成都乃以知綿州高定子措置文龍備預定子部分諸將扼青嶺擒鉞

金完顏乞哥豐城人系出蕭王諸孫太和六年十二月克階州同知軍事次年宋復階州乞哥戰死於嘉陵江

明朱顯忠維揚如皋人太祖時以指揮僉事從傅友德攻文州遂留守之蜀將丁世貞召番寇數萬來攻顯忠拒之蜀將趙元帥復與

甘肅新通志

卷六十一

職官志 將才

三十八

丁世貞合兵攻城愈急城中兵僅七百人食且盡外援不至部下勸出城求生路顯忠厲聲曰爲將守城存與存城亡與亡豈有求活將軍耶決戰而死事聞遣使致祭贈鎮國將軍都指揮使王均諒太祖時爲文州守禦千戶丁世貞陷城被執不屈磔死於東門上事聞遣使致祭厚卹其家

顧 鐸成化間爲階州守備征趙家坪吐番亡於陣

高 節秦州人守固原衛軍政十年綽有能聲三年例當軍政關陝道援例考舉掌文縣千戶所印修理 廟學整飭衙宇關隘城樓橋梁無不聿新

种 勛字世賞其先順天通州人正德中襲父霄鞏昌衛指揮使守備西固屢立戰功後官至總兵佩征西將軍印鎮甯夏嘗自誓期靖邊塵賀蘭不復有烽燧之警

田 輔西安衛人嘉靖二十九年守備文縣立堡寨謹烽火嚴邊防申軍法募敢勇時訓練洫任三年番人不敢犯邊

郭 琥字宗器歐甯人幼機警慷慨有大志嘉靖中補西固城守備以功遞升至延綏鎮總兵佩征西將軍印強幹勁骨猿臂善射騎馬拾物矯絕倫輩雖不知書而以意作檄頗中肯綮持身潔與人恭在軍整肅軍民不擾

丁永臣甯羌州人嘉靖四十五年守備文縣御軍嚴而有法一清如水文人至今頌之

史 臣榆林衛人隆慶元年守備文縣勇冠三軍番人畏威洫任以來軍民得以安枕

花延武萬曆三年守備階州夏四月吐番虬力哱犯階被執以刃挾之不屈復炙以火延武大罵番留之明年三月守道劉伯燮副

甘肅新通志

卷六十一

職官志 將才

二十九

將孫國臣興師問罪哱請降姑從約既而誅之延武瘐死

孟孝臣神木人萬曆五年守備文縣秉性忠勇精於騎射整兵巡邊不憚其勞與士卒同甘苦

郭 邦山西平定州人萬曆六年授階文西固參將修砦堡建墩垣番不敢侵後升洮岷副將

葉 青平涼衛人萬曆九年守備文縣創修關隘番廠

李承祖榆林衛人萬曆十二年守備文縣精射技勇敢善戰番人畏威

劉宏業甯夏衛人萬曆二十一年守備文縣工詩文書畫

馮 洪榆林人萬曆中守備階州遇敵身先士卒吐番爲之膽落王繼勳岷州衛人萬曆四十八年守備文縣智勇兼備先是月連等族屢犯邊殺掠甚慘繼勳統兵深入勦捕幾盡事聞總兵以索

賄未遂竟掩其功公論惜之

任承爵河南人由武進士萬厯中授階州參將精於用兵番不敢犯

張外勳榆林衛人崇禎七年守備文縣夏五月時堵截流寇戰於臨江橋頭救援不至食且盡兵潰外勳死之事聞優卹軍人張改光韓彬亦隨死

王政北直隸定興武進士崇禎八年守備文縣忠勇絕倫志平番亂挺身深入毛庵番族矢石夾攻戰死於寨下民堡政素得民心聞者莫不慟哭贈鎮國將軍蔭一子錦衣衛官從征鎮撫張祖勳內丁洪宇等俱戰死亦有卹典

李自忠高陵人崇禎九年守備文縣守城禦寇頗著勞績後征番戰歿

甘肅新通志

卷六十一

職官志 將才

四十

柳應時榆林人崇禎十四年由環縣守備升階州參將洺任時賊方攻城應時以步卒三百力戰卻之於是招集流亡撫恤殘民訓練士卒樂於用命故所戰必克有古名將風

國朝董焜神木人順治七年任階州副將輕裘緩帶有儒將風築隄防番嚴於堵禦以軍功當遷忽一病不起兵民如喪所生
羅映臺山西人順治十三年任階州副將築城建橋修門樓葺古剎法令嚴肅兵民相安

林忠福建人康熙二年任階州副將撫民以寬馭兵以嚴治甲兵儲火器修城垣造舟橋建學宮葺公署整理沿邊防戍功績昭著

吳掇桂岷州衛人由武進士康熙十二年冬因滇黔之變仗策謁靖逆侯恢復洮岷授階州遊擊十五年七月率兵恢復階城未幾

撤兵駐岷十八年冬復至階兵不血刃而城復西南各邊寨每患生番搶掠惟搭牙一族猖獗尤甚桂統兵由烽火嶺入攻番人望風羅拜如駱駝西吳等族俱內附邊寨得甯

梁生輝南鄭人同治二年署階州遊擊三年八月奉調在兩當防禦戰歿事 聞賜卹

王炳勳安徽涇縣人河南縣丞隨黔勇來甘剿賊屢立功同治四年春髮逆踞階州炳勳歷各鄉採糧抵野牛寺遇賊適鞏秦階道林之望督勇亦至炳勳率民團夾擊賊大敗夏五月官軍穴地道攻階州炳勳運糧至隨黔勇逼城西南與賊戰賊多死炳勳亦罹矛傷俄地道發營勇肉薄登城炳勳於城塌處昌火而進持矛刺殺數賊遂克州城因創甚舁歸營夢寐中猶呼殺賊不已越日卒事 聞優卹如例

甘肅新通志

卷六十一

職官志 將才

四十一

何勝必湖南人以功累擢至提督授甘肅肅州鎮總兵 賜號禦勇巴圖魯同治初四川總督駱秉章知勝必善戰調赴蜀分統湘果右營所向克捷以積勞病時作然每聞寇警猶力疾從事三年蔡啟二逆踞階州奉調由陝西入甘助擊病增劇以四年正月十九日卒臨終猶以未能殄賊爲憾事 聞優卹如例

蔣 榮皋蘭人由守備署階州遊擊時城中僅百餘人城陷力戰死節事 聞賜卹

洪 章康熙四十八年任西固守禦所千總番匪猖獗章督兵剿誅歿於陣事 聞蒙 予世襲恩騎尉罔替

劉福陞湖北黃陂人由行伍同治七年署西固營都司西口番匪大肆猖獗福陞督兵親勦誓欲掃蕩賊氛夜踏賊營死於火槍夫

人張氏亦殉節閤營憫其忠義建祠祀之

馬任遠岷州人由武舉康熙十八年任文縣守備性好善雍容有儒將風修臨江橋營署文民德之後升懷遠守備

程 梓蘭州人康熙四十七年任文縣守備在文七載練兵卒嚴紀律值西固番變檄調赴援至則部署卒伍嚴陣以待出奇兵以勝之殲賊無算民賴以安旋委署西固都司後陞西甯鎮標遊擊張金榜湖南武陵人由武進士康熙六十一年任文縣守備秉性溫良慈愛重修玉虛山殿宇北路棧道士民立碑頌德武廟陰平橋南海寺皆所續修文民德之附祀魯公遺愛堂之西

慶陽府

漢夏 育北地太守熹平三年鮮卑入寇育率休屠追擊六破之
晉李 毅甯州刺史愛撫士民威著諸羌毅卒諸羌叛州人奉女秀
領州事綽有父風獎勵戰士嬰城固守城中食盡炙鼠掘草以食
伺敵稍怠輒出兵掩擊破之堅守經年

王 遜字邵伯魏興人永嘉四年爲甯州刺史披荒糾厲收聚離
散誅豪右不奉法者征伐諸彝俘馘以千計威行甯土莫不震服
後李驤來寇敗之追至瀘水在州十四年州人復立其中子堅行
州府事詔除甯州刺史假節

姚 岳受王遜方略與將軍姚崇爨琛等拒李驤於堂狼大破之
時爲將軍以功名顯

南北朝梁徐文盛字道茂彭城人大同末持節督甯州刺史推誠撫

甘肅新通志

卷六十一

職官志 將才

四十三

慰示以威德諸彝感之風俗頓改

隋姜須達開皇八年以成州刺史爲會州總管頗著威德

唐趙 縱守慶州戰死杜牧以詩弔之

宋姚內斌盧龍人太祖時爲慶州刺史在郡十餘年西夏畏服不敢
犯塞

田仁朗元城人開寶七年以西夏寇邊選知慶州仁朗至率麾下
往擊大破之其酋長相率請和仁朗烹牛置酒與之約誓邊境乃
甯璽書褒美

慕容德豐太原人太平興國二年知慶州兼邠甯都巡檢嘗破小
遇族奪名馬數十匹詔書褒諭居任九年以簡靜爲治邊鎮安之
閻日新臨渙人真宗時爲慶州都監命管句邠甯環州駐泊兵馬
時部署張凝屢入邊界焚族帳日新皆提兵應援未幾知慶州上

言野雞三門等族恃險隘桀黠難制請開古川道東至樂業鎮西出府城從之

田 敏易州人眞宗時爲環慶路都總管時後橋屬羌數叛擾邊敏誅違命者十八族又敗羅骨於三店川餘詳甯夏將才

趙 振字仲威雄州歸信人景德中爲慶州沿邊都巡檢使時金湯李欽等三族尤悍難制振募降羌陷以利令攻破十餘堡欽等詣振自歸振爲置酒共飲爲樂取細仗圍財數分植百步外共射欽等百發不中振十矢皆貫欽等驚愕誓不敢犯後知環州元昊將反爲金銀冠佩隱飭甲騎遺羌屬振潛以金帛誘取之以破其勢及劉平等皆敗惟環慶無患

孫 沔字元規會稽人仁宗時知慶州元昊死諸將欲乘隙大舉沔以乘危伐喪非禮止之戰亡遺骸聚而葬祭之軍中感泣凡三

甘肅新通志

卷六十一

職官志 將才

四十四

知慶州邊人服其能

耿 傳字公弼河南人以蔭通判慶州元昊入寇參任福行營軍事遇敵姚家川諸將失利敵騎益至武英勸傳避去傳不答英歎曰英當死君文吏無軍責奈何與英俱死傳愈前指顧自若被數創乃死

杜維序安喜人權知慶州會任福敗以騎兵數千破賊三砦斬首數百級

范 恪開封人康定初爲慶州北路都巡檢使與攻白豹城破之旣還夏人遣騎襲其後恪設伏邀擊斬首四百級生獲七十餘人嘗與總管杜維序鈐轄高繼隆分討漢乞薛馬都嵬三砦恪破都嵬而繼隆圍薛馬不能下馳往取之旣又援維序而下漢乞砦馬懷德祥符人爲環慶路副都總管環州番官蘇恩以其屬叛往

降之

高 敏登州人爲環慶都監主番部事羌人以兵三十萬來寇總管楊遂駐兵大義以敏爲先鋒將夏人攻奪大順水砦敏出戰多所斬獲次榆木援兵不至中流矢亡

劉 幾洛陽人孫沔薦其才堪將帥使知甯州俗喜巫軍校仗妖法結其徒亂有日幾使他兵伏壘門以伺夜半盡擒之

趙 高字公材邛州依政人知慶州羌哆名昌詭稱送幣將入寇高知番主自信可使信適以罪繫獄破械出之告以其故約期日使往果縛取以歸明年夏人寇蘭州高遣將間道出敵砦後要斷其歸路斬馘甚眾遷龍圖閣直學士

鄭 僅字彥能徐州彭城人知慶州諸軍多殺老弱持首級要賞僅下令非強壯而能生致者賞半之有內附羌追寇得老人不忍

甘肅新通志

卷六十一

職官志 將才

四十五

殺擒之乃其父也諸路爭進討奏捷僅獨保境不生事寇亦不犯种師中字端孺世衡之孫知環州又知慶陽府老成持重爲時名將榆次劉韜言師中聞命卽行奮不顧身雖古忠臣不是過也
孫 路開封人哲宗時知慶州章惇柄國復議取棄地時諸道相視未進路聲言修舊壘載器甲樓鹵頓大順城下夜半趨安疆遲明據之六日而城完遂築興平橫山

范子奇河南人哲宗時知慶州廣儲蓄繕城柵嚴守備羈黠羌推誠待下人樂爲用

明康 泰景泰問守備都指揮使讀書通大義禮賢下士政體肅然又能濟之以和軍士仰戴其子亦防守一遵泰法慶人並感焉

趙 璧右所千戶少知大節力搏數人善騎射好讀書通春秋左傳尤工推步法大都督仇廉器其才能優置帳下天順間從征師

潰於莊浪壁以身蔽廉中五矢不忍去廉知其爲己遂自刎壁方奪路出賊莫敢追疾革謂家人曰我年逾七十死亦何恨第未能爲仇將軍復讎耳子盤孫蟲兒俱以忠勇聞

龍 相正德中任慶陽衛指揮僉事驍勇善騎射敵人入寇督軍戰於箭竿嶺躬冒矢石被重創死

張 隆慶陽衛指揮使正德末陞環慶守備練達事體註選軍政掌衛印事盡革從前失律飢法積弊雖猾胥老掾無弗斂畏凡戰守機宜悉心綜理於要害處設伏預備撫恤軍士自承襲以至爲將清白一節與寒素不殊嘉靖間有部將被圍隆赴援以兵緩謫戍莊浪卒

廖 綸慶陽衛指揮幼孤事母以孝聞長知學嫻武藝總制器重之視衛篆清白自持剛正守法嘗日坐堂皇至晏乃退事無大小

甘肅新通志

卷六十一

職官志 將才

四十六

咸綜理之從征山南麾下多所斬獲巡撫黃公以首功薦暨協同甯夏威名愈著屢以堵截之功賞賚襲衣金帛有差

李朝陽祖父皆本衛指揮僉事陽親禮賢士父歿襲職部奪其級受安邊守禦所正千戶泣任苦志折節不數年卽以首功復祖職適大修邊牆某軍門委辦錢穀出納分明旋署衛印陞延綏游擊戰功尤多授右衛參將右衛孤懸邊塞困於薪爨居人不能爲生陽令人出耕及樵採營運身自率兵馳獵境上不踰年衛人殷阜後以敵寇被勦削職陽被繫之日老少攀轅號哭至夕不得行錦衣官亦咨嗟稱歎會掌衛力爲請雪得以功贖免後復參將陞副將協守密雲薊州等處致仕歸居鄉恂恂人目爲李秀才歲舉鄉飲延爲上賓

周 欽爲慶陽衛後所千戶膽略過人以行伍屢有殺敵執馘功

陞前職未幾致仕嘉靖三十五年賊數千來犯定邊欽援弓躍馬先出督眾血戰及賊稍卻乃復以大將軍礮擊之適礮炸擊欽首立殞時人哀之

周嘉彥靖邊人爲城守練兵營都司驍勇善戰段復興愛將也崇禎時流寇圍慶城命分守西北一帶曉夜戒嚴及賊登城率家丁五六人持刀巷戰一可當百仰天大呼曰我殺賊數十足以報國恩矣仍手殺十餘賊力竭殺所乘馬自刎死

國朝慧 齡字紹彭一字智軒博爾濟吉特氏滿洲正藍旗人慶陽知府葆鏞子同治五六年間回逆擾慶陽慧齡以戰功保縣丞會提督雷正綰率兵至甯州置精臺於早勝鎮之二里半堡檄慧齡司飛輓事六年三月十七日賊猝至攻堡慧齡率眾堵禦身罹二十餘創堡陷被執勸之降慧齡怒曰余豈從賊者耶不屈死其妻彥

甘肅新通志

卷六十一

職官志 將才

四十七

佳氏憤詈擊賊并及於難子榮燕榮庶均幼慧齡母朱佳氏竊負以逃倖得免事 聞議卹如例榮燕旣長襲雲騎尉世職

王楚仁字蓋臣湖南甯鄉人師事粵人周甲精擊刺與諸健兒角鮮敵者同治六年以參將隨平慶涇固道魏光燾西征擢副將九年領環捷營偕署環縣知縣余甫勳駐環縣遇賊卽擊賊憚之十年八月十三日訶知回逆馬彥澂竄進二十里溝往剿賊於途鞠生擒者稱此股僅百餘楚仁以馬逆爲賊魁誓殲之追六十餘里至洪德城已日晡矣而援賊之聚火焰山者殆數百楚仁掩擊賊驚且戰且走少間月出朗如晝賊見我兵少噉黨返鬪哨長余植補拔刀迎斫力猛刀忽折被賊斷腕歿於陣時塵戰竟日兵飢疲軍火亦竭楚仁顧左右僅二十餘人乃收入空堡賊攻之禦以石稍卻十四日楚仁率殘兵突圍出賊轟以礮子落顛碎親兵同死

者十餘人先是都司楊振家夜出乞援比隊至而楚仁已歿振家亦被擒後振家斃於洪德城之二十里外蓋賊繫之行不屈故遇害也視傷處臙腑洞見指腕均斷死尤慘事 聞得 旨王楚仁照總兵例余植 楊振家照游擊例議卹植 湖南長沙人振家湖南湘陰人

甯夏府

北魏刁 廳饒安人眞君五年爲薄骨律鎮將表求鑿渠溉公私田
又奉詔以薄骨律等四鎮出車牛五千乘運屯穀供軍道多深沙
車牛艱阻廳請造船水運以備不虞築城儲穀置兵備守詔從之
卽名爲刁公城以旌功焉

隋元 胄洛陽人素有威名拜靈州大總管北夷甚憚焉

吐萬緒字長緒鮮卑人爲夏州總管甚爲北夷所憚

唐李道宗唐宗室武德五年爲靈州總管時梁師都弟洛仁連突厥
兵數萬人寇道宗閉城嚴守伺隙出戰大破之振耀武威斥地千
餘里邊人悅服

解 琬魏州元城人景雲二年爲朔方軍總管分遣隨軍河陽丞
張冠宗肥鄉令韋景駿普安令于處忠等料三城兵省其戍者十

甘肅新通志

卷六十一

職官志 將才

四十九

萬人琬在邊二十年務農習戰多爲長利邊境安之

五代郭 瓊盧龍人晉天福中刺史警州羌渾騷動朔方節度使張
希崇薦爲部署將兵討平之

葉元福并州晉陽人晉開運中爲威州刺史番酋拓跋彥超等攻
靈州詔以河陽節度馮暉鎮朔方召關右兵進討以元福將行營
騎兵元福與暉出威州土橋西遇彥超兵七千餘元福轉戰五十
里殺千級擒三千餘人朔方距威州七百里無水草號旱海師須
齎糧以行至耀德食盡彥超眾數萬布爲三陣扼要路據水泉以
待暉軍軍中大懼暉以玉帛求和彥超許之至日中列陣如故元
福曰彼知我軍飢渴邀我於險欲困我耳遷延至暮則吾黨成擒
矣彼雖眾而精兵絕少依西山爲陣者是也乃以麾下先擊西山
兵敵果潰元福舉旗招暉暉軍繼進彥超大敗橫屍蔽野是夕入

清遠軍明日至靈州元福入宋爲檢校太尉鎮陝州

宋王 侁字祕權開封人官秦州副將雍熙二年帝遣之靈州與田仁朗等討李繼遷繼遷陷三族仁朗次綏州請益兵帝聞三族已陷竄仁朗商州侁出銀州北破悉利諸砦麟州諸番皆請納馬贖罪討繼遷侁與所部兵入濁輪川斬賊首五千級繼遷遁去郭守文復與尹憲擊鹽城諸番焚千餘帳由是銀麟夏三州番百二十五族內附戶萬八千餘

田 敏字子俊以應募壯士隨曹彬破賊補指揮使端拱初佐大將軍李繼隆出狼山襲契丹至滿城獲首級甚眾旣而敵陷易州敏失其家所在帝擢敏本軍都虞侯賜白金三百兩使閒行求其父母得之以歸李繼隆討夏州奏隸麾下敏率兵至靈州橐駝口雙塢西遇敵斬首三千級獲牛馬橐駝鎧仗數萬計繼隆上其功

甘肅新通志

卷六十一

職官志 將才

五十

遷御前忠佐馬步軍副都軍頭

郭 密貝州經城人淳化中夏人寇邊以密有武略擢靈州兵馬都部署訓練士卒號令嚴明夏人畏服邊境賴以安謐

明甯 正壽州人洪武中以河州指揮兼領甯夏衛事修築漢唐舊渠引水溉田開屯數萬頃兵食饒足

陳 瑀正統八年任中衛鎮撫所鎮撫詳請建學首開文教許 永以都指揮守備靈州天順間追寇至河套鹿泉乃據險掣全軍回力戰射虜酋數人又斃酋子三人力竭遂自刎敵憤甚剗其肉煮其骨以灌駝

盧 茂成化間以都指揮守備靈州驍勇兼人到任之二日敵以百騎來犯茂單騎馳突之俄敵漸眾而茂兵亦至奮呼一擊斬其犯陣一將餘悉遁去數歲不敢擾靈境

吳 昭宏治閒任中衛掌印指揮董率學校

曹 紀宏治閒任中衛千戶督修學宮增建牌坊

左 方宏治十二年任中衛西協參將經營學制措置工料

馮 正正德元年任中衛西協參將續修學宮愈增其制

張 臣榆林衛人嘉靖五年以總兵官守甯夏順義王俺答報怨瓦刺欲取道賀蘭臣不可俺答恚語不遜臣夜決漢唐二渠水道不通復陳兵赤木口俺答乃從山後去三歲互市毋敢譁者

王 效延綏人讀書能文辭嫻韜略精騎射嘉靖十一年以武進士充總兵官代周尙文鎮甯夏吉囊犯鎮遠關效與梁震鄭時史經敗之柳門追北蜂窩山蹙溺之河斬首百四十有奇璽書獎賚吉囊復以十萬騎窺花馬池效同震拒之不得入轉犯乾溝震分兵擊敗虜遂趨固原又趨青山峴大掠安定會甯效移師還援破

甘肅新通志

卷六十一

職官志 將才

五十一

之安定再破之靈州斬首百五十餘級十五年賊據芴苦灘打磴口等地效率副總兵馮大儉任傑奮擊之斬獲無算賊乃遠遁董一奎宣府前衛人由都督僉事歷鎮甯夏以勇敢著

董一元奎之弟勇如兄而智略過之嘉靖十五年以副總兵協守甯夏哮拜之亂套中諸部長悉助之一元乘其西掠輕騎擣土昧巢獲首級百三十驅其畜產而還寇內顧引去擢延綏總兵晉署都督同知

姜應熊榆林人漢之孫嘉靖二十七年以宣府西路參將充總兵官鎮守甯夏三十三年套寇數萬騎屯賀蘭山遣精騎掠紅井應熊戒將士固守以綴敵面委千戶孟鸞潛師攻敵營斬首百四十級晉都督同知越二年套寇踏冰西渡由甯夏山後直抵莊涼應熊等掩擊獲首功百餘級擢右都督三十六年賊又犯謙邊黑鹽

池曹湖灘等地應熊率兵奮擊斬獲無算百餘年來罕見此捷姜氏爲大將著邊功凡五世

麻 貴大同右衛人哱拜之亂以貴協鎮甯夏時分五隊攻城貴以游兵主策應哱拜自北門出戰欲逃句套部貴逐之入城別遣將馬孔英麻承詔擊套寇援兵俘斬一百二十人諸道並進城中攻益急賊奉金告急於卜失兔等套部果合兵而宰僧自花馬池由沙墀入貴迎擊於石溝又與提督李如松夾擊於張亮堡追至賀蘭山斬首級示哱賊賊始奪氣城破賊平貴以功進秩予廕馬孔英宣府塞外人積戰功爲甯夏參將萬曆二十年布木巴反引套寇掠甯境孔英屢敗之卜失兔入下馬關又從麻貴邀擊大獲晉本鎮副總兵二十四年著力兔宰僧犯平虜橫城孔英偕參將鄧鳳力戰斬獲甚眾詔賜金幣擢署都督僉事以總兵官鎮甯

甘肅新通志

卷六十一

職官志 將才

五十二

夏

杜 松字來清崑山人有膽識累功爲甯夏守備萬曆二十二年卜失兔大入下馬關松偕游擊史見等以二千騎邀擊馬蓮井小勝誤入伏中重傷麻貴援兵至松復裏創力戰寇始敗走論功遷延綏參將麻貴大舉擣巢松以右軍出清平塞多所斬獲晉副總兵尋改甯夏東路歷鎮延綏薊遼四十五年移山海總兵奉詔援遼歿於陣天啟初贈少保諡忠壯

李如柏字子貞如松弟萬曆二十三年鎮甯夏著力兔犯平虜橫城如柏邀之大獲斬首二百七十有奇晉右都督

杜 桐字來義崑山人松之兄萬曆二十五年鎮甯夏著力兔宰僧入犯逆戰水塘溝俘斬百二十寇益糾諸部連犯平虜興武桐督馬孔英諸將連破之斬首二百餘級諸部俱乞款乃復貢市桐

自偏裨至大帥積首功一千八百時服其勇以功進左都督太保
崇明伯諡武康

杜文煥字毅武崑山人桐之子歷官延綏甯夏總兵屢破套虜多
首功尋以疾歸天啟七年復起鎮甯夏甯錦告警詔文煥馳援俄
令分鎮甯遠晉右都督調守關門尋引疾去

杜宏域崑山人文煥子天啟初歷官延綏副總兵七年夏文煥援
遼卽擢總兵官代鎮甯夏官至右都督

史 勳由世襲指揮同知歷任水利屯田都司多惠績遭倅劉變
被賊囚禁載餘堅貞自矢濱死不渝

賀虎臣保定人崇禎二年任甯夏總兵時逆賊王嘉允陷府谷其
黨李老柴應之攻合水虎臣戰於盤谷敗之又擊斬慶陽賊渠劉
六六年察漢呼圖克圖令套寇薄靈州虎臣力戰死之事聞贈都

甘肅新通志

卷六十一

職官志 將才

五十三

督僉事加同知

張國祐浙江會稽人任中屯衛守備崇禎三年套酋約犯兩河國
祐督陣河西會河東守備牛冲漢設謀陷敵賈勇衝鋒國祐力贊
軍門洪承疇扼要出奇斬首四千七百有奇隨擢參將

靳桂香靈州參將明季無爲教稱居士作亂夜入城殺河東道曹
孟吉時桂香已卸事乃率眾守城門使賊不得出盡攻殺之

國朝馬 玉字振英負圖子歷官甯夏右營游擊進剿吳逆由四川至
雲南屢立戰功能以仁惠濟其智勇干戈之際全活甚眾後授左
都督卒於官

趙周誥浙江人官玉泉營游擊同治二年逆回馬化澂陷甯夏賊
黨率眾圍營周誥嚴備守禦有宋某爲賊內應引之入周誥呼子
振涂努力殺賊以死報國子曰父能死忠兒能死孝戰移時父子

中槍死守備劉致福把總劉青雲亦殉於陣事 聞並賜卹如例
劉瑞雲官甯夏營外委同治二年逆賊陷郡城瑞雲操戈巷戰身
受數創歸家與妻訣妻謂君壯盛力能殺賊曷出亡爲日後報國
計吾母子自有萬全之策請勿以爲念瑞雲出繼思逃亡非義仍
馳歸見妻已縊於梁子女三人皆中毒死瑞雲遂自刎一門忠節
時論稱之

譚拔萃湖南人同治十二年授甯夏總兵時大亂初平萑苻徧野
拔萃整飭軍備修浚城垣地方賴以安枕民稱頌焉

馮南斌廣東人光緒初兩任甯夏總兵和衷共濟大公爲心恤老
憐貧兵卒整肅

張永清字鑑亭河南舞陽人光緒中以甯夏總兵權甘肅提督三
十二年仍回本任雍容裘帶有儒將風在任三年兵民安業旋卒

甘肅新通志

卷六十一

職官志 將才

五十四

於官

郝失名

官平羅千總開渠於城之東鄉接引唐來灌溉荒蕪由是

東南一帶咸開墾焉

葉生蓮以恩騎尉世職署靈州營守備同治二年城陷陣亡

李生美官靈州營把總同治二年城陷賊開東門生美持刀迎擊
在月城陣亡

麻如柏靈州營外委同治二年城陷陣亡

王振邦靈州營外委同治三年奉檄赴西路偵探行至中衛縣之
長流水遇賊引刀自刎

易德麟湖南湘鄉人積功保提督 賜號格洪額巴圖魯同治七
年捻逆張總愚入關德麟隨劉松山往來截剿賊不得逞遂自晉
北竄窮追至燕齊之交合淮軍夾擊殲之德麟功最多旋從總督

左宗棠入隴松山總湘軍出綏德取北路德麟部五營分道進收撫土匪十七萬眾疊蕩回巢至靈州東八年秋八月進攻吳忠堡屢戰屢捷夷逆壘二十八日薄堡下賊抵死抗拒礮彈如雨德麟勇氣彌厲率壯士踰塹急攻賊恟懼驟發銃中德麟左乳舛歸越日卒事 聞勅建專祠諡壯節優卹如例

王秀棣湖南衡山人老湘軍左旂營弁戰關隴屢有功保提督同治八年八月攻吳忠堡左脅中槍丸入骨際劉松山憫之令護運秀棣曰去險就安帥憐我也雖然敢以病自廢乎病轉劇以九年八月九日卒於軍時同事周國勝與秀棣皆以驍勇稱每受傷猶裏創進而秀棣傷痕尤多事 聞優卹如例附祀提督劉松山祠閻定邦湖北羅田人以功保總兵同治初來甘隸固原提督雷正綰部擢提督 賜號博勇巴圖魯領精選中營借補甘肅提標後

甘肅新通志

卷六十一

職官志 將才

五十五

營都司當金積堡之合圍也大府擬濬長壕困之定邦奉檄督修與士卒分舉鋤畚舊傷發益以疾咯血不止同治九年十月二十六日卒於營事 聞廕卹如例附祀提督劉松山祠

馮 堯順治元年任中衛指揮僉事人皆懾服

顧來鶴江甯府人康熙十三年由武舉任中衛掌印守備以督催民夫防河因變遇害

周國勝湖南湘鄉人從老湘營平捻逆繼勦陝北土匪回匪自秦入隴所向皆捷積功保提督 賜號博奇巴圖魯總統劉松山奇之委管中軍五旂同治八年九月進圍金積堡國勝率眾銳攻飛礮折左髀舛歸旋沒

朱蘭亭四川人由武童入蜀軍爲陝安道黃鼎所識拔積功至參將同治八年九月進攻金積堡回巢逆眾萬餘皆驍悍善戰蘭亭

以兩軍扼要之所向披靡忽右臂中礮血殷重祛軍士覩其狀憊甚請少息蘭亭指揮眾軍裏創力戰卒獲勝返營仆地曳之起扶卧牀褥至十月初五日卒事 聞優卹如例

簡敬臨字紹雍湖南長沙人累功授提督銜浙江衢州鎮總兵賜號鏗僧額巴圖魯因受傷過多呈請左宗棠懇 恩開缺後宗棠移督陝甘檄敬臨募勇西邁同治八年八月以所部由靈臺出崇信經馬頰口擣水洛城土匪老巢時廣東陸路提督劉松山已統湘軍勦馬化澂巨股於金積堡敬臨勦土匪既定遂自中路轉而北旋敗陝回白彥虎甘回李正榮等股於石家溝賊益北徙敬臨躡及於黑城子逆首楊文治著紅衣領悍黨千餘來撲陣斬之獲所持鐵矛驗之重十七斤又乘勝攻李旺堡穆家潭各逆堡悉數夷毀遂自韋州進紮秦渠偏渠而壘扼金積之東南劉松山一

甘肅新通志

卷六十一

職官志 將才

五十六

軍在金積堡之北相距約十數里而中隔波浪湖廢堡林立賊時踞之聲氣難於聯絡十一月初九日逆行與湘軍相持敬臨聞北路礮聲甚緊急率部由東面進賊馬步齊撲敬臨結方陣待之槍礮刀矛一時並舉斃賊無數而北路之與湘軍接仗者亦經松山擊敗敬臨銳意衝過波浪湖與劉軍合隊並勦瀕及矣忽南風大作塵沙翳天咫尺莫辨賊之匿於廢堡者然槍密注子洞敬臨左臂方裏創繼進間又飛子中敬臨頭顱立殞於陣同時提督姚連陞總兵譚正明鄧雲高副將秦龍瑞羅榮貴參將宋維朗晏發貴徐有錫王致清彭鼎升游擊熊在新陳有忠顏友源李忠信侯澤順皮二喜周海庭都司劉固明丁雲祥胡玉發王喜章守備陳祖耀等均同時陣亡事 聞敬臨及連陞均照提督陣亡例議卹並加 恩予諡餘優卹有差

黃萬友湖南湘鄉人從湘軍積功保提督 賜號瑚松額巴圖魯
同治八年總統劉松山率師度隴檄萬友領步隊五營分駐甯條
梁安邊定邊花馬池一帶兼護運道飛輓絡繹軍食以充九月大
軍規甯夏萬友助剿克靈州浹辰之間夷堅壘數十賊氛大懾後
松山由吳忠堡進攻金積老巢萬友駐靈州招流亡給牛籽多所
全活九年正月松山陣亡劉錦棠接統其軍以萬友幫辦營務洞
中機宜因傷發卒於營事 聞優卹如例

西甯府

明李 達永樂初以都指揮使帥師破西甯申藏諸番生繫其魁進都督僉事餘詳鞏昌府將才

汪 淮甘州都指揮正德七年任西甯守備猛鷲有膽略能於馬上運火槍夷犯北川淮追至旱坪山夷望淮軍皆衣絳俱有神狀淮奮擊之中其酋豪夷眾遂潰斬馘無算投崖墜塹者不可勝計國朝張世耀直隸人由武進士順治二年任西甯副總兵修關隘築礮臺勵精振威將士強勇四年逆回丁國棟等擁眾大通河口威迫湟中回民世耀與兵備馮如京暨冶參戎據險設伏大敗之郡民感頌

補 艾陝西榆林人順治六年任西甯副總兵勇敢饒智略張世耀敗走逆酋丁國棟當事者於凡回民之所聚究不能無疑屬艾

甘肅新通志

卷六十一

職官志 將才

五十八

至甯廉訪得實還報而旁猶有爲讒說以冀動搖者艾正色斥之湟中回民賴以安全及協鎮是郡坦直簡易得士卒心番土懷畏而其尤足驚人者曾以親兵三十騎突戰賊賀珍盈萬之軍無不披靡其驍勇冠一時

柏永馥字雄蘭奉天漢軍正黃旗人由世襲順治三年補授臨鞏總兵官十六年移駐西甯爲設鎮之始建威布恩簡士馬慎選舉重修衙署整飭斥堠展演武廳繕軍裝庫恤兵愛民陞陝西提督去之日兵民刊碑頌德

劉印景道光二年任鎮海營副將西番蠢動搶劫青海蒙民經陝甘總督長齡以通曉番務奮勇爭先超陞鎮海協征勦青海番匪屢立大功

賡 音以部推任鎮海營副將奉派察漢託洛亥城駐防截堵河

南野番劫掠青海東北之要路番匪阻跡

王 昇由秦州遊擊任鎮海營副將辦理團練勤慎有法堵禦陝匪未得入境時襄辦團防者有都司柏如松亦同心協力能共甘苦

鄭連拔湖南人提督銜補用總兵由督標中協任鎮海營副將督飭兵勇修築道路補葺城垣西石藥水二峽皆經填砌易崎嶇爲平坦行人咸稱便餘詳平涼府將才

劉厚福湖南人官總兵同治十二年大軍克河州遂規西甯置逆回馬本源於法其另族隸巴燕戎循化者地分八工爲撤回相率繳械獨青稞莊距循化較遠匿械弗獻厚福整部前往賊潰而逸梟逆酋馬乙麻等十餘人青稞莊平而大胡卡勒兩工仍抗拒厚福往剿之從他途入賊偵知設伏以待厚福至不及防中槍洞小

甘肅新通志

卷六十一

職官志 將才

五十九

腹立殞營弁姜有貴湖北人同歿陣事 聞優卹如例

李秀山里居失考從湘軍討髮逆保提督 賜號克勇巴圖魯同治十一年四月隨總統劉錦棠剿西甯叛回二十四日駐彥才溝賊分隊來撲秀山擊卻之賊緣山逸復從談和義陳宗蕃等鼓銳登山斃悍賊數十名賊乃大潰二十五日黎明羊角溝賊由四十里鋪築礮臺與賊壘相望二十六日陝回白彥虎出驟馬千餘牧灘外秀山命轟開花礮礮彈落驟馬羣者半入賊壘者半賊棄壘越山遁追十餘里夜分始返明日又敗之於山麓閒而羊角溝賊股之謀襲我軍者亦不戰自退白逆之敗去也餘黨踞觀音堂等處堅守不出秀山念深溝高壘非計誘不可乃密白錦棠令宗蕃等乘夜抽隊返彥才溝爲搦戰計而伏兵於隘二十九日宗蕃出溝口索戰賊大隊果衝至宗蕃僞敗賊鼓譟來追號礮作各伏羣

起賊奔追殺數十里會駱駝堡卡賊見大軍窮追突出數百騎爲牽制計秀山分兵攻卡賊刀矛交集左脇被數創猶呼軍士力戰卡破而秀山墜馬鉛丸復洞腦遂殞事 聞優卹如例

朱南英湖南人隨湘軍轉戰江浙累遷至提督同治十年從大軍克河湟 賜號效勇巴圖魯十一年陝回就撫而大通屬回黨仍附馬桂源爲亂時總統劉錦棠平西甯督師進剿至姑姑加莊南英爲前驅率數十騎迎擊總兵張大興等繼之斃其酋馬良才賊勢蹙遁踞向陽堡築礮臺以自固錦棠督軍三路夾擊之賊分道與我軍抗不敵退入堡士卒肉薄而登南英然巨礮燬堡門諸軍攀堞駢升賊喪膽狂竄奪堡東壞垣走南英窮追旋中矛洞脅死總兵張大興守備許得勝雷春秀張茂林把總戴樹森陶得勝高占魁秦滿才姚喜庠均同時陣亡

甘肅新通志

卷六十一

職官志 將才

六十

楊志勝 記名提督任鎮海營副將奉派玉樹番辦理兩族互爭之案平息了結光緒乙未回亂督率紳民與同知承緒都司張得勝襄辦團練深爲得法

愛隆阿由旗員推陞鎮海營都司抵任創設營中義學兵民子弟同沾惠澤

陳 書由西甯前營雲騎尉世職兩任鎮海營都司明習軍事勤於防堵

柏如松由甯夏鎮屬石空寺堡守備任鎮海營都司奉派防堵局與紳民倡辦團練深資得力

張德勝由巴暖營守備陞補鎮海營都司教練士卒修理軍庫整飭營義學增置器具百廢皆興光緒乙未回亂襄辦團防尤著勤勞卒於官

涼州府

南北朝高 湖字太淵渤海人世祖時爲涼州鎮都大將有惠政卒
諡曰敬

隋賀婁子幹代人開皇元年吐谷渾寇涼州子幹以行軍總管從上
柱國元諧擊之功最優高祖慮邊塞未安卽令子幹鎮涼州明年
突厥寇蘭州子幹率衆至可洛峽山阻川爲營賊軍不得水數日
人馬困敝縱擊大破之

乞伏慧馬邑鮮卑人高祖時涼州總管突厥屢寇慧嚴警烽燧遠
爲斥堠突厥憚之不敢入境

明劉 林洪武初爲涼州衛百戶額森特穆爾叛掠涼州林戰沒於
城西竇融臺事聞賜祭於臺下

李 忠直隸人由廬州衛指揮同知從征本雅失里擊敗阿魯臺

甘肅新通志

卷六十一

職官志 將才

六十一

有功遷指揮使宣德四年調鎮番衛掌印指揮授衛守備昭勇將
軍

陳 佑順天人天順二年虜寇鎮番以佑充游擊將軍來援時虜
張甚佑變旗幟張設疑兵城守月餘虜益兵圍之勢甚劇佑身先
士卒鼓譟而出所向披靡自辰至午殺賊二百餘級生擒者半城
賴以全

姜 爽榆林人襲爵都指揮嘉靖二年以功擢副總兵分守涼州
進署都督僉事充總兵官西海賊犯涼州爽率軍士擊於苦水墩
大破之殲厥渠魁追還所掠餘詳甘州將才

徐彥章鎮番衛城守守備嘉靖十五年禦寇於鹹柴堆殲厥渠魁
餘黨悉平

郭 琥福建人少勇毅嘉靖間任永昌衛指揮與羌戎戰身先士

卒套虜入寇屢建奇功歷陞總兵官餘詳階州將才

周 欽萬歷間任永昌指揮使屢戰皆克捷餘詳慶陽府將才

呂 憲河南人萬歷間任永昌指揮使多立軍功陞黑松遊擊

張奇才萬歷間任永昌指揮使剿扒沙有功進行都司僉事陞大靖參將

張世忠順天人萬歷間由永昌百戶陞古浪守備征大靖有功擢肅州遊擊

張君恩湖廣人萬歷間由百戶征黃台吉有功擢金塔守備授永昌衛指揮同知遷洪水遊擊

馬應龍河南人才兼文武萬歷間由永昌指揮使任陝西軍政僉書進固原遊擊屢立邊功歷任甘州甯夏協加都督戢甯功最帶河西三司五道

甘肅新通志

卷六十一

職官志 將才

六十一

劉 濟長安人萬歷間任永昌衛指揮多戰功歷陞甯夏協嗣授甯夏總兵官加都督餘詳蘭州府將才

趙時正直隸人萬歷間任永昌衛指揮使撫軍習戰具有方法生平嚴正一無所苟歷陞洪水遊擊

王從諫字納忠隄人勇略過人任蔡旗堡守備都指揮同知萬歷中套虜侵境築城浚壕建營房修墩汎絕虜出入兵民賴之後遷阿壩嶺都司

趙 御字竣甫允吾人天姿卓犖勇冠一時崇禎元年授蔡旗堡守備未幾套虜犯境御率兵迭次拒戰虜懼而遁嘗捐金糴糧分給墩軍以故每遇虜警咸爲用命後擢甯夏洪廣營遊擊

王孟顏神木人崇禎間任大靖營參將招壯丁汰老弱購備戰馬修築邊牆墾荒以廣民田造窖以便民汲皆有益於地方十年套

虜人寇提兵堵截斬級奪馬自是不敢犯境

南 魁萬厯間任永昌指揮僉事天啟四年率兵征剿北虜破之嗣又據甯遠境外赤腦兒之地繼且督兵剿之以功擢高溝堡守備崇禎四年征上山兒有功陞同僉事子朝棟襲

南朝棟魁子崇禎五年以蔭兼永昌營中軍插酋犯境率兵征之大勝後以北征有功陞監軍守備歷陞臨鞏鎮屬遊擊

國朝師帝賓延安人康熙三十年任涼州鎮總兵恩威並著緝盜安民歿祠祀之

王雲胤正黃旗漢軍人雍正三年任涼州鎮左營遊擊曾征西海追殺羅卜藏擒黃台吉

萬年新湖南人由提標中軍參將權涼州鎮總兵同治元年鹽茶廳屬逆回馬兆沅等叛年新奉檄往援與固原兵相犄角二年春

甘肅新通志

卷六十一

職官志 將才

六十三

固回內變陷州城年新率降回王大桂往剿至李旺堡因後軍未集築壘以待逆首穆三詭遣其黨僞降年新恐爲所給令大桂入城窺虛實甫行而悍賊糾黨圍年新營年新憤甚督兵出戰殺賊無算血殷其衣圍益厚兵潰被賊擁之入回寺死於亂刃事 聞優卹如例

忠 善涼州右翼四旗蒙古驍騎校同治二年正月間赴靖遠防勦在東閘門烟墩溝沙河沿馬鞍橋等處與賊接仗十五次勦殺生擒者十數名奪獲器械甚多事 聞優獎如例

夔 昌涼州滿營防禦同治四年奉派攻勦涼州逆回奮勇力戰大獲全勝六年解鎮番之圍收復斐家營堡疏通西路前後力戰十五次殺賊數名奪獲器械甚多十二年隨營攻勦肅州逆回克復城垣迭蒙 褒獎光緒二年正月間復攻勦瑪納斯賊巢陣亡

事 聞優卹如例

隆 元涼州滿營驍騎校同治六年力解鎮番之圍收復斐家營堡疏通西路與賊接仗十五次殺賊十數名奪獲器械甚多光緒二年正月間攻剿瑪納斯賊巢陣亡事 聞優卹如例

達爾護奉天蔭生康熙間任永昌副將敦師重儒精嫻武略

佛 遜鑲紅旗覺羅乾隆間任永昌副將營規嚴肅恩威並用督兵征金川力戰死

和 明順天人由武進士乾隆十年任永昌副將整軍有法待士有恩工字能詩雅號儒將

德 元正紅旗滿洲索綽絡氏咸豐間任永昌副將不惜俸金修葺城垣後經兵燹有備無患

蔣光晉湖南人慷慨有智略同治四年權永昌副將會率兵護糧

甘肅新通志

卷六十一

職官志 將才

六十四

運至城東四十里堡突遇賊騎光晉指揮馳逐敗之六年冬賊乘夜襲城光晉同知縣張秉田督兵擊走之七年冬賊復乘夜登東南城時光晉秉田均卸任繼任副將常守仁督兵由東城抵拒光晉秉田率獵勇赴南城迎擊所向輒奔復以劈山礮轟退之光晉於交鋒時中槍殞命秉田令軍士勿聲仍呼眾奮擊逾時賊退城得不陷事 聞光晉優卹如例

張 學里居失考以都司管帶懷義左營衛隊懷義軍者石成器所聚土匪也收降後勒以部伍仍令成器領之駐紮永昌其弁瞿占元趙元杰謀亂總兵王仁和慮其軍復叛遂令回營涼州赴大靖土門一帶護運道另檄學駐兵豐樂堡成器內不自安聞學營盡起疑乘間攻已遽噉眾掩襲學營學猝不及備力戰死

王子善由指揮任鎮番衛守備歷任延綏都司順治間剿賊有功

陳應啟漢軍人任鎮番參將勇敢有材能後禦敵中傷卒
霍煜直隸人任鎮番衛參將謙恭下士寬嚴並濟康熙間征剿
澤旺殺戮甚眾力盡卒於軍闔邑立遺愛碑

曹之賢雲南人任古浪大靖守備出征塞外力戰陣亡

周國遠字永安貴州黃平人同治元年隨護西甯鎮張華來甘屢
有功擢都司入督標營九年秋西甯逆回撲平番國遠督軍禦賊
於縣西十里鋪時軍士新集驟接仗不任戰事國遠單騎衝突回
顧從卒俱潰歎曰男兒束髮從戎今死疆場幸矣提戈直前亡於
陣

張萬美字佐臣湖南善化人從湖北水師營積功保總兵 賜號

志勇巴圖魯同治四年總督楊岳斌令萬美帶楚軍前營五年誅
靖遠香匪捕擊附省諸竄賊會張家川華亭等處逆黨嘯聚萬美

甘肅新通志

卷六十一

職官志 將才

六十五

往剿數挫其鋒擢提督七年接統南字各營進駐洮河蕩陳馬二
莊回巢九年秋陝西逆回攻平番萬美赴援力戰陣亡總兵彭清
勝湖南湘鄉人同時死之事 聞萬美 贈太子少保清勝 贈
提督銜

章三元湖南常甯人同治四年隸楚軍南字營從陝甘總督楊岳
斌入甘剿回五年平靖遠香匪六年擊退張家川華亭大股回匪
七年剿毀陳馬二莊賊巢八年復肅州累功擢遊擊十二年冬督
軍擊賊於平番縣屬之沙溝力戰陣亡事 聞蔭卹如例

劉璞字連城陝西洵陽人光緒間署涼州鎮總兵時奉檄赴平
番西八堡一帶堵賊保護難民車馬數百奪回賊掠婦女無算惜
無援兵遂致璞之從子守備劉進才哨官趙太和得騰姚建基
曾治坤等皆遇害

甘州府

漢耿 夔字定公國從子也永元三年從竇憲爲校尉將精騎八百出居延塞直奔北單于廷於金微山大破之

北魏裴 修字元奇父駿修以婦父李訴事出爲張掖子都大將明設烽堠以方略禦羌夷在邊六年關塞清靜高祖嘉之徵爲中郎令轉中大夫

明莊 得洪武二十四年爲山丹衛都指揮開設衛治督農講武城池衙署軍械倉儲皆所創建連年麥苗有一莖雙穗之祥人以爲德政所致後從盛庸敗燕軍於夾河斬其將譚淵會燕王以驍騎乘暮掩擊得力戰死之

孫 禎山丹衛千戶宣德十年虜寇張掖入哮囉日禎率六十人禦之虜卻禎單騎追擊遂被害

甘肅新通志

卷六十一

職官志 將才

六十六

彭 智鳳陽人正統間山丹衛都指揮僉事善撫士卒學校公宇多所增置

王 璽太原左衛指揮同知成化十二年擢署山丹衛都督僉事鎮甘肅勇而有謀復洪武中舊制立石與南羌畫界樵牧不得越十七年復哈密在邊數載甚爲羌人所憚

彭 清字源潔榆林人由世襲指揮累官左副總兵宏治十年擢都督僉事鎮甘肅清性廉潔御士有恩威名甚著番夷憚之十五年卒家貧不能歸軍民婦豎皆流涕而遺命不得受賄贈帝聞發帑資之賜葬祭

傅 楫湖廣應山人爲陝西行都司斷事司副斷事嘉靖元年甘州總兵李隆曠兵爲變戕殺巡撫許銘脅屬吏爲奏誣銘以掩己罪楫執意不可爲隆所捶幾斃而隆謀亦寢甘人義之都御史陳

九疇等爲銘建祠以楫配享焉

姜 爽榆林人甘肅總兵官謀慮深沈紀律明肅尤能詩文嘉靖二年回賊寇張欽堡爽領兵敗之嗣破土魯番西海卜兒孩及吉囊等寇屢立戰功邊人稱爲良將著有籌邊餘興集

葉 勳嘉靖二十五年爲鎮羌參將敗寇於山丹斬首百餘級張 臣榆林人起行伍知兵善戰萬曆十八年積功授都督同知鎮甘肅破卜失免於水泉又上書陳八難五要餘詳甯夏府將才董繼舒宣府龍門所人以都督同知鎮甘肅天啟四年銀定糾海西古六台吉等人犯甘州繼舒擊之斬二百餘級

郭天吉山西人甘州副將父失名號郭神箭累射殺賊崇禎十六年河干失守天吉與巡撫林日瑞歸保甘州城陷父歿於賊天吉殺妻子巷戰被執罵賊不屈磔死之 國朝賜諡忠烈

甘肅新通志

卷六十二

職官志 將才

六十七

國朝劉良臣北直隸人府志作奉天鑲黃旗人順治四年任甘州總兵逆回米刺印久蓄叛謀欲圖之而未敢發會調兵征湖廣茅蘆山刺印佯言兵變誘良臣至北關遂被害

黃得功奉天人任甘州游擊逆回米刺印謀叛得功覺之密獻計於總鎮劉良臣未及發爲賊所殺

黃益瑞蔣鳳翔同隸總兵王仁和部仁和解涼州圍益瑞以參將遷副將鳳翔以千總遷守備同治六年正月甘州南山賊竄撫彝高臺益瑞帶左營與副左中二營由甘峻堡進剿賊敗入民村乘勢進攻奪回所踞民村者三斬二百有奇俄賊大至我軍以眾寡不敵倚甘峻堡結營自固距賊僅咫尺仁和聞報派鳳翔帶衛隊營馳救並商請安肅道黎獻派兵自水龍堡來援十五日賊悉眾薄營我軍奮力抵禦自辰至午賊攻撲愈急而黎營之援不至益

瑞鳳翔再四衝突迄不得出賊層層圍逼我軍傷折大半是夜益瑞陣亡鳳翔亦中礮殞

王 瑞字祥卿河南人咸豐間從征髮捻各逆累功至花翎參將同治六年隨烏魯木齊提督成祿攻圍肅州甫至撫彝而陝回數千西竄瑞聞警率隊馳擊血戰竟日眾寡不敵遂遇害

下文學河南人以征髮捻諸賊累功至花翎游擊同治六年統帶馬隊駐防撫彝值回匪西竄文學督隊奮擊殪賊數十人後援不繼遂受重創而歿

陳長生字紫亭河南人幼有膽略咸豐間從征髮捻各逆歷保至花翎游擊光緒十九年經撫彝通判原逢時延聘入幕經理錢穀深倚賴焉二十一年逆回叛十月長生率步隊與參將某率馬隊進剿西甯道經永昌縣之水泉堡賊四面竄入參將先遁走長生

奮力血戰自寅至午手斃數十賊賊將敗會長生彈罄力折民房木椽縱橫擊賊賊乘閒蜂擁至羣矛叢之勇亦奮鬪無一逃者遂致全隊覆沒死事最慘百姓至今猶歎惜不忘

肅州直隸州

漢耿 秉字伯初博通書記深明司馬兵法明帝時拜秉征西將軍
進屯酒泉行太守事

唐李嗣業河西節度使時安史亂上徵兵河西嗣業發兵五千以綏
德府折衝段秀實自副將之詣行在收京有功

明李 彬永樂十年以豐城侯鎮守甘肅兵由鐵門關至亦林真集
追襲叛達誅之及宋琥還彬代之

鍾 振任肅州指揮使正統二年朵兒只伯犯邊赴敵而死

衛 穎直隸樂亭人正統初襲濟南衛指揮使土木變作奉詔入
衛累進都督同知天順元年以奪門功封宣城伯天順中充總兵
鎮甘肅持重周慎練達戎務五年虜寇孛來擁眾入境穎率兵戰
於涼州十三里鋪三晝夜不解甲大敗之七年番酋扒沙等擁眾

甘肅新通志

卷六十一

職官志 將才

六十九

阻截糧道穎復領兵至沙唐川斬獲無算在鎮十年增城堡造戰
具至今人稱之

彭 清官副總兵分守肅州征哈密有功陞都督僉事餘詳甘州
府將才

周尙文西安人爲肅州參將廉公自持恩威並濟諸夷獻馬者憫
其貧而不受仍賞之諭以法度有送酥油者以一指嘗之餘卻還
若搶掠盜竊必擒其首惡輕者合手釘於盤而放之重者梟首掛
於山口以示眾諸夷畏服皆曰周參將不要我的錢只要我的命
由是路見遺物以爲誘彼過而不視於時山族安堵州境清甯
龔子敬浙江金華人守鎮夷遊擊調征甯夏叛寇力戰陣亡

國朝盛 祥滿洲人旗分失考官沙州參將擢督標副將道光二十年
權鎮肅州廉謹有威適遣犯百數十人與換防兵相鬩勢將釀變

祥急率標兵持械往諭曰敢輕動者立撲滅遂誅首犯眾懼就撫
事 聞奉 旨褒嘉

英 蘭滿洲人旗分失考子爵揀發副將同治四年二月權肅州
左營遊擊任事甫旬日而城陷蘭率兵巷戰力竭死之

巴克興布滿洲人旗分失考岔口都司同治四年署肅州右營游
擊已卸篆二月二十五日夜二鼓賊入城卽手雙刀呼兵往擊無
一應者憤甚隻身躍馬殺入賊中馬傷墜地復步戰轉前欲登城
守禦忽中賊槍死同時又有游擊德祥千總夏承惠把總吳德魁
皆巷戰力竭死

王 斌陝西寶雞人以武生隨提督文岱征髮逆補外委後岱長
子恆齡署安肅道撥斌隸部下同治三年冬新疆回叛哈密屢請
兵無敢往者斌慨然行齡選健勇百五十人使將出關又集流亡

甘肅新通志

卷六十一

職官志 將才

七十

得四五百人抵格子煙墩軍渴禱於神掘地竟得泉至沙泉子軍
飢搜店壁又得豆糧二十餘石五年正月賊分數股出一圍斌營
一焚附近民莊一掠斌殊山糧臺糧臺失居無何烏魯木齊提督
成祿統兵抵肅調斌軍歸節制而總兵黃祖淦亦檄斌軍歸調遣
三月初成軍進二墩黃軍據城北令斌進軍斌卽移屯葉家莊賊
慮斌斷其往來乘壘未就突來撲祖淦遣參將胡唐帶勇三百助
斌鑿壕未成而賊已闌入斌刃數十賊中傷歿於陣斌與士卒同
甘苦雖枵腹荷戈無一怨者旣死遠近聞者莫不流涕喪至金塔
居民會葬者數千人至今猶稱道弗衰云

黃祖淦江西人起家行伍累官至副將同治五年權肅州總兵時
城陷於賊淦駐金塔堡修戰具三月至北營率眾與賊戰屢勝提
督成祿軍適至淦令部將王斌移營近城合成軍攻擊斌軍壘未

穩夜爲賊襲淦聞馳援則斌已陣歿六年四月王仁和接鎮篆淦自領軍與賊相持十月賊來攻營出戰中礮死淦性廉謹自奉儉約是時各營將多娶民人女爲婦獨淦與其兄沔弟洛不取雖饟糈供自民間然百計撙節不得已之苦衷時流露於形色及其卒也眾皆哀之

鄧德祥湖南人隸肅州總兵王仁和部積功遷總兵同治七年楊占鼇署甘州提督時逆黨踞肅州與官軍抗五月占鼇進剿至亂古墩城逆傾巢出占鼇慮兵單約王仁和屯河北爲援二十三日占鼇軍進駐牌樓墩距城八里方築壘騎賊數千啟關出與仁和軍遇於郊外五里之雷壇另以步賊撲牌樓墩占鼇督守備楊東山程正興等趣隊合仁和軍夾擊槍礮如雨烟焰四塞日亭午壘初就忽陰晦賊喘息少定復回戈轉鬪步騎雜進士卒衝擊十數

甘肅新通志

卷六十一

職官志 將才

七十一

次賊多夷傷而死戰殊未卻德祥督後隊至躍馬陷陣當者輒踣移時賊潰走德祥猛追俄飛子中胸洞之遂墜騎殞於陣是役也賊氣驟奪我軍直薄城下而還同時捐軀者有都司張邦玉守備楊東山戴益和千總唐得勝高玉德

塔爾通阿滿洲人官布特哈正白旗公中佐領驍勇善戰從將軍金順立功保副都統同治十二年金順攻肅州命塔爾通阿掘長濠蹙之逆回馬四數出城皆擊退濠成無何陝回白彥虎率眾來援至毛目提督陶生林副將桂錫楨率騎截擊毛目城得不陷塔爾通阿守長濠拒援賊三月二日白逆掩至野馬灣距肅城五十里將自外人約城賊自內突圍送眷屬出繼乃內外夾擊我軍金順偵知之飭各營嚴防並選騎隊備追剿是夜三鼓有馬蹏雜遝聲自東北來漸近塔爾通阿率所部以連環槍轟擊旋聞馬蹏聲

紛紛如鳥獸散遲明見斃馬三十餘匹賊尸枕藉遺糧械於道尾迹之知爲援賊聚於西南之塔兒灣金順督大隊往剿而城內馬逆遂出股分犯濠界塔爾通阿策馬奮進倏飛子洞胸背歿於陣其挖長濠擊援賊疊次陣亡者有佐領銜儘先防禦郭綽克札儘先防禦委官連陞儘先驍騎校依立善儘先驍騎校勝祥郭爾固善儘先都司徐桂林涼州鎮標後營把總王垣事 聞均優卹如例

楊世俊字曉峯湖南長沙人以功洊保提督 賜號斐凌阿巴圖魯同治八年從總督左宗棠西征遂分領騎隊先後平董志原降土匪數萬人搜剿靜甯會甯等處餘匪時通渭安定竄逆出沒行旅斷絕世俊屯馬營監往來馳剿東道乃通旋總統宗岳平西安字各軍九年春陝回數千自金積竄狄道世俊截擊於紅土窪馬

甘肅新通志

卷六十一

職官志 將才

七十一

家堡斬馘最多乘勝進渭源及狄道兩城皆下九年冬剿黑頭潰勇於岷州明年元夕擒首惡置諸法南路匪黨悉平進屯太子寺糧匱部勇稍卻降參將嗣河回就撫乃由西甯大通間道出肅州十二年八月十九日攻肅州城礮石如雨世俊肉薄先登中槍陣亡事 聞復原官其同在肅州血戰前後捐軀者 記名提督前署肅州總兵王子龍湖南湘陰人總兵陳登雲四川崇慶州人總兵周玉林湖南長沙人游擊張林安徽蒙城人世俊子龍入祀京師昭忠祠給騎都尉兼雲騎尉世職餘 卹廕如例均祀本籍昭忠祠並於肅州建專祠祀之

楊光德慶瑞張起龍魯光明尹忠順皆以鎮將領兵攻賊先後陣亡

姚 諒字子京直隸人武進士善謀有勇先任淮安守備後陞高

臺營遊擊康熙三十二年火酋罕頓拜代犯邊諒身先士卒破虜
有功授甘州城守營參將又奉命督修邊牆工竣陞廣東督標副
將歿於官

安西直隸州

漢班 勇超之子安帝延光二年爲西域長史將兵屯柳中十三年
鄯善龜茲溫宿諸國降附因發其兵到車師前王庭擊走匈奴於
伊和谷於是前部始復開通後累破匈奴車師兵

隋史萬歲時爲大將軍坐事配敦煌詣總管竇榮定軍門請自效榮
定遣人謂突厥曰士卒何辜請遣一騎挑戰萬歲出戰斬其首而
還突厥大驚請盟而退

唐李栖筠安西行軍司馬安史反上徵兵栖筠發兵七千勵以忠義
而遣之

元郭 侃事憲宗從征西域自癸丑訖己未凡七年下其城無慮數
百降其算灘數十算灘華言王也中有乞石迷部地方八千里相
傳四十二世勝兵數十萬侃至悉平之其國王殿宇構以沈檀木

甘肅新通志

卷六十一

職官志 將才

七十四

侃縱火焚之香聞百里得其七十二絃琵琶併五尺珊瑚燈檠以
獻